

HYPOMNEMATA 2
DIDACTICA,

S I V E

MEDITATIONES

D E

INSTITUTIONE,

D E

INGENIORUM

Discrimine & Cultura.

CANTABRIGIÆ,

Ex Officina Johan. Hayes, Celeberrimæ Aca-
demia Typographi. MDCXC.

Impensis Sam. Simpson Bibliopolæ Cantab.



M



ptin
bus
gen
fom
lius
tz,
ope
fibu
ali
pub

2053:15



Hypomnemata Didactica.

S I V E

MEDITATIONES, &c.



MENTIS agitationes, sive quotidiani Conceptus, quos *Meditationes* appellamus, etsi plerumque nobis invitis aut incogitantibus evanescant, & in nihilum abeant: Etsi carptim & per intervalla oboriuntur, sedentibus, ambulantis, hoc agentibus, aliud agentibus, nihil agentibus, interdum etiam somniantibus occurrant, & abeant; Nec melius cohærere videntur, quam scopæ dissolutæ, aut arena sine calce. Non tamen inanis operæ fuerit eas aliquoties recolligere, sensibus imis reponere, in methodum digerere, aliis communicare, & (si utiles visæ fuerint,) publici juris facere.

2. Quod non ideo dictum velim, ut hisce

Meditationibus gratiam conciliarem, aut quasi lectorum animos præoccupare studeam, qui Comici illud meritò mihi occinent, *Nihil dici posse*, (præsertim in hoc Argumento,) *quod non dictum sit priùs.*

3. Ea est enim hodie Scriptorum copia, excrevit adeò librorum multitudo & moles, ut nihil fere sit in universâ rerum naturâ, de quo homines verba faciunt, quin idem quoque scriptis quorundam tentatum & explicatum sit. Quicquid eruditionis habet terrarum orbis, per literarum commercia ad nos transit, aut certè transiturum videtur.

4. Proinde qui honori suo velificantur, & nominis celebritatem ambiunt, rarius aliquod Argumentum quærunt; aut pro genio seculi, novo & inaudito more tractant. Literis ad amicum confectis, alii Cramben repetunt, Hypothesin alii novam excogitant, alii Historiâ fictâ splendide mentiuntur, aut Scripto erotico amare & peccare docent. Alii ad mensuram ingenii sui, potius quàm rei veritatem, Hominem, Oratorem, Principem, aut Reip. statum, undiquaque perfectum, & omnibus suis numeris absolutum describunt, qualis fortasse nunquam extitit: (licet hoc scribendi genus etiam apud Veteres usitatum est,) Hic (dum multa pro libitu affingunt, omnibus quæ impedimento esse possint omis- sis, atque ad exactam adeò normam omnia compo-

componunt, qualem nec ipsi observare poterint, nec quisquam alius,) fortasse ipsa novitas gratiam conciliabit, aut styli concinnitas & elegantia placebit.

5. Qui argumentum vulgare & tritum sibi sumunt, ubi nec novitas nec elegantia locum habet; & ad institutum vitæ despicabile, (quale est pistrinum literarium,) insuper damnati fuerint: Poterint hi fortassis aliis utiles esse, sibi commendationem conciliare vix poterint; præreptâ (si qua fuerit) ab aliis gloriâ.

6. *Nos tamen hoc agimus*, & si quid præstiterimus quod in usum generis humani cesserit, facilis erit gloriolæ jactura. Hic nota, vulgaria erunt omnia: Hominis institutio tradetur, quâ nihil in humanis utilius, sed nec quicquam vel scriptis, vel sermonibus hominum magis tritum.

7. De institutione Civili passim fermocinatur vulgus, scribunt docti; adeo ut si quis eâ de re porro verba fecerit, is ut famæ suæ minus consulere, ita actum agere, Iliada post Homerum scribere, & aliorum vestigiis insistere videbitur. Et certè maxima pars eorum qui hodiè scribunt, variandi potius formulas quærere, quàm aliquid de novo excogitare videntur.

8. Me quidem perpetua vitæ consuetudo hujus Argumenti quotidie commonefacit, ut-

pote in hac arenâ aliquandiu exercitatum. Et quum in hoc vitæ institutum, five ratione, (ita enim mihi videtur;) five casu inciderim; five *Jovis odio*, (ut vulgari diverbio dicitur) impulsus fuerim; *Meditationes*, & *Observationes* meas, etsi modestiæ periculo, (quâ nihil in rebus humanis antiquius duco,) simpliciter enarrabo, & lectorum æquanimittati permittam.

9. Probè novi, tanti plerumque esse scripta, quanta est scribentis auctoritas, & æstimatione Lectoris; illa, sentio in me quàm sit exigua; hæc varia & incerta erit, pro capto & ingenio Lectorum. Proinde nec laureo. Jam in mustaceo quæsiturus, tantum mihi fumo, aut id præ me fero, quòd hoc argumentum Doctorum virorum scriptis toties ornatum, auctius hîc & emendatius proditurum sit. *Nil tanti est; Ego fungar vice cotis*, aut indicis personam sustinebo, quod mediocris est Auctoritatis, & Benevolentiam sapit, potiùs quam Facultatem & Excellementiam.

10. Proinde quum nec in alieno foro verfor, nec in sterquilinio meo arrogantius ausus sim, non est quòd ego me credam patrocinium debere criminis, quum nullum sit. Missâ itaque ulteriori verborum ambage, quum satis superque præfatus sim, ad rem ipsam accedo.

11. Illud imprimis in hominis institutione tenendum esse arbitror, ut posteritatis ratio habeatur. Etsi enim nullo illius sensu afficiuntur angusti animi homines, qui sibi tantum & vitæ præsentis consulunt, bonorum tamen spes & cogitationes ad posteros spectant, & alteri seculo prospiciunt. Ubi tametsi ab eorum sensu omnia remota sint, spe tamen & cogitatione quâdam delectantur.

12. Quum majorum delicta minores sæpe luant, vel ex eorum virtutibus fructum percipiant ; nulla sanè res præsentis seculi homines certiùs in officio continebit, aut post venturis seculis felicitatem conciliabit, quàm cura & providentia de Nepotibus suis probè & honestè instituendis. Quid proinde utilius, aut humano generi conducibilius esse queat, quàm Institutione honestâ & civili, de posteris benè mereri ?

13. Neque enim temerè peccabit, qui posteritatis curâ tenetur ; quem nulla illius ratio tangit, is certè perturbandis potiùs rebus, quàm confirmandis idoneus videtur. Proinde qui Remp. salvam esse vultis, *Cavete vobis ab* eorum Consilio quibus nulla spes in posteris reponitur : Qui in Republicâ evertendâ nihil sceleris intentatum relinquunt, Quòd iis nulla soboles est, quæ parentum scelus luat, aut si qua fuerit, eam extinctam malunt, utpote eorum ingratis natam.

14. Et

14. Et in nostrâ quidem potestate partim situm est, ut Minores boni sint, & honesti; Proinde, si coloni qui segetem expectant, & solum & semen idoneum eligunt, & qui pecora alunt, curant imprimis & admillarium & genitale arvum è generosiori Stirpe seligendum; ne fœtus oriatur agrestis, & ferox, ut incultis silvestribusque locis usu venire solet. Imò qui solummodò corporis exercendi animique oblectandi gratiâ, canes Venaticos alunt, de Catulis progignendis & enutriendis, non minùs solliciti sunt. Turpissimum est in humanâ sobole tollendâ minorem curam adhibere; aut filios nostros quibus vitæ lampada tradituri sumus, incultos & ineruditos habere. Fateor equidem, hanc rem, saltem ubi nos agimus, & apud cultiores quasque Gentes, magnâ ex parte prudenter administrari: Tametsi (ut humanum est errare) nonnulli imprudentiâ laborant, & usque laborabunt.

15. Fuit tempus, quum homines in agris pecorum fere ritu palati sint, tectis sylvestribus pernoctarent, quod ex novi Orbis incolis, & Gentibus novissimè cognitis colligere licet, ubi hodie ita se res habet. Hic perexigua Religionis aut Officii cura, legitimarum Nuptiarum, aut prolis instituendæ fere nulla. Sed quamprimùm commodiùs degendi causâ in Familias coaluissent homines, Paterfamilias,

familias, qui & Præceptoris simul & Judicis munus obibat, quæ ad Religionem & usum vitæ spectarent suos edocebat, & delinquentes castigabat; ut inter proprios lares & schola esset, & tribunal.

16. Distributi ergo in familias homines, & sub imperio constituti, si minùs instinctu, aut naturæ ductu, (sunt enim quorundam mores prodigiosè perdit, & ab affectu naturali penitus abhorrentes,) saltem exemplo moniti, aut lege coacti, posteritatem meditantur: & sobolem cautè enutriunt.

17. Licet non desint quidam, (nec è vulgo solùm sed & ex iis qui nobilitatis titulo insolescunt, quos tamen in vulgo meritò annumerare licet,) qui præ incitiâ, incuriâ, aut voluptatis studio, posteritatem rarissimè meditentur: Ex eorum numero fuit, qui, quum ortus esset sermo de curâ pro posteris habendâ; Eccur inquit de posteris adeò solliciti erimus? quid tantum pro nobis illi fecerunt? quâ in re de nobis posterì bene meriti sunt? Et *sexcentos licet ejusmodi proferre*. Qui modò rem suam salvam habeant, & sartam tectam sibi conservent, posteritatis curam fati permittunt.

18. Ad vagam autem effrænâque libidinem coercendam, & sobolem diligentius enutriendam, divinitus datum, & institutum fuisse videtur connubium. Et certè libidinem
quan♦

quantumpote coercet, & in humani generis regimine, omnia sapientum decreta. omnium rerum publicarum leges & instituta facile exsuperat. Quanquàm perditissimâ hâc ætate, reperti sint qui in divinum hoc institutum insurgunt, idemque confertâ tormentorum serie, velut è nave præsiariâ quassare conantur. Dum enim hæc meditarer, Ecce prodit poema quoddam tralatitium, cujus epigraphæ Latine sonat, *Conferta tormentorum series in matrimonium.*

19. Divino huic instituto laudes astruere, aut ejus commoda enarrare, nec penes me est, nec est hujusce loci: Inde certè est, quòd societas humana ex immensâ multitudine in arctum conclusa, amorem mutuum firmiùs retinet. Inde cura de prole tollendâ probeque instituendâ; Inde magna pars scelerum & maleficiorum evitata, quæ palantes & enormi libidine grassantes necessariò comitantur. Erunt fortasse incestus, erunt stupra admissa quandoque, etiam in republicâ optimè constitutâ; permissa nunquam. Vitia proinde hominum censenda sunt, non reipublicæ, in quæ non publicè consensum est.

20. Vetus erat querela, hodièque manet, omnia in deterius ruere; seculum novissimum à majorum probitate immane quantum degenerasse. Atque id si unquam aliàs certè hoc seculo meritò dolendum est; quum lenitate,

tate, indulgentiâ, aut alio quodam errore factum est, ut à majorum virtute plurimum recedatur. Majores equidem nostri, licet inutilibus & ludicris artibus, (quibus hæc ætas impensè delectatur,) minùs dediti : At regimine, morum formatione, & suorum institutione, (quæ artes omnes facilè exsuperant, & sine quibus non erit reliquis locus,) nobiles extiterunt.

21. Queruntur nonnulli mundum senescere, imò delirare, citra spem in melius proficiendi : nec injusta esset querela, sed nimis heu dolendæ rerum humanarum vices, nisi bona & honesta institutio huic malo aliquantum obsisteret, ejusque rotam sufflaminaret.

22. Ætas nostra (si vera loqui liceat) est sui admiratrix, seculorum priorum contemptrix. A Majoribus inventa aut tacet, aut vili pendit, sua deprædicat. Et sanè quum nobis edocendis priora secula tanta contulerint adminicula, grande aliquod & eximium à nostris hominibus jure expectari poterat. Ut facilè est inventis addere. Et ne quicquam iis derogare videamur, Hic sanè expectatis non deciderunt, quin multa, & eximia excogitarunt.

23. At majorum inventis suos interim stet honos, quandoquidem ea quæ ab iis accepimus, utilissima sint, ut rem observantibus non obscuro

obscurum erit. Eximia certè sunt ea quæ ab antiquis tradita usurpamus ; sed quia trita, & quotidiani usus, ideo parcius observantur, & minoris fiunt. Præter artes quas liberales dixerunt, philosophiam item, ejusque species ; Architectura, Agricultura, Figulina, Fabrica metallica & lignaria, Vini & aliorum potulentorum varii apparatus, Lactis in butyrum & caseum coagulatio, Panificium, Terrina, Metallorum fusio, Vitri coctio, Navigatio, (ut multa deperdita taceam,) antiquis seculis accepta ferenda sunt. Et quid his utilius excogitavit ætas nostra ? Nos quidem jactis olim fundamentis superaddimus quædam, & à majoribus inventa ornamus. Nec omnia prioribus seculis accepta ferenda, & nostra ætas multa in posterorum usum tulit. Et post ventura secula forte plura insuper dabunt.

24. Demus hæc omnia exercitati ingenii non magni, rationis, non rectæ rationis, hominum non autem sapientis opera fuisse, ut nimis argutè quidam distinguit ; (Nam ingenia magis lascivire aliquoties gaudent, neque rei veritatem ; quàm verborum lenocinia quærunt.) Certè thesaurus inventus, non ex inventoris ingenio, sed ex rei utilitate æstimandus.

25. In ipsâ re literariâ quid literarum inventionem utilius ? quid tachygraphiâ admirabilius

bilis, quæ scribendi celeritate vivam vocem exæquat ? ea autem veteribus innotuit. Quin & typographiæ inventio satis vetusta, utpote quæ ducentis (& quod excurrit) abhinc annis solertissimè excogitata, majoribus nostris jure ascribenda est. Motuum cœlestium calculatione, & inde temporum distributione in annos, menses, dies, horas, nihil potuit, aut poterit, utilius reperiri : Hæc autem majoribus accepta ferenda sunt.

26. Sed ut è diverticulo in viam redeam. Majores nostri eâ certè arte claruerunt quæ omnibus potior est, arte regendi, & imperandi peritiâ. Quin & suis obsequium & modestiam imprimis commendabant, quò vitam postea suam meliùs atque prudentiùs instituerent, & (si res tulerit,) feliciùs cum imperio & potestate essent. Neque enim credibile est eum bene rem gerere posse, aut aliis moderatè & prudenter imperaturum, qui non aliquoties obsequi noverit, & alienum imperium expertus sit.

27. Regimen fanè res mirabilis est, Et providentiæ divinæ argumentum nobis subministrat. Nam & unum posse multis imperare, & multos velle uni obtemperare, divinum quoddam numen rebus humanis interesse & prospicere indicio est. Quum dictante quodammodò naturâ, homines plerique omnes liberi & sui jûris esse malunt, quàm in
rebus

rebus etiam dubiis & controversis iudicio alieno stare.

28. Hodie nimium indulgent; atque id unicuique in votis habent parentes plerique omnes, ut filii sui, audaculi, interriti, inverecundi sint, ut ingentes sibi animos sumant: Unde graviter imperii fræna patiuntur, obsequium & modestiam ut res obsoletas vili pendunt, & pro nihilo habent.

29. Non facit fortasse indulgentia mendaces, aut avaros; At feroces, arrogantes, audaces efficit; Et istiusmodi audax arrogantia, seu arrogans audacia, etsi virtutes omnes eliminat, apud hoc seculum in virtutibus numeratur, imò sola atque unica virtus perhibetur: Hinc qui scurriliter ineptiunt, & quicquid habent ingenii, in rebus levibus, scommatis & argutiis prodigunt, in deliciis sumunt sciti meherculè homines, & (si diis placet, ingeniosi; ludibrio fortè posteris futuri. Et multò quidem tolerabilior res esset, si in levibus se continerent, Sed ut religionis articulos, arcana imperii, & ardua reipublice negotia licentiùs excutiant, idque in desiderabilis, & tabernis ubi decocta quædam exotica sorbent, Hoc quidem ferendum non videtur.

30. Non omnium dierum sol occidit. Nec adeò conclamati sunt mores hominum, ut nulla sit spes in melius redeundi. Studia quidam

dem humana, mores, consuetudines, virtutes etiam & vitia, in hujusce vitæ nostræ rotâ, quasi circulo quodam cunt, redeunt, & pro seculi genio variantur. Hominum quidem peccata sunt, non seculi, quæ suis quisque temporibus objicit. Mobilia tamen sunt vitia, pellunt invicem, & fugantur : Atque ut temporum vices, ita & morum vertuntur.

31. Infausto proverbio dicitur, *Heroum filios noxas esse*, & certè nimis id verum est, doctorum (aut alioqui insignium) virorum filios plerumque nequam & degeneres esse. Sive quòd istiusmodi homines Venerem negligentius exerceant, ut quidam lepidè jocantur; sive quòd rebus magnis exercitati, aut profundis cogitationibus immerfi, de liberis instituendis minùs solliciti sint, quàm homines proletarii, & plebei, quibus sola spes est in sobole melioris notæ tollendâ, solùmque vitæ auctarium in posteris consistit. Quòd si à se impetrare velint viri eximii & eruditi, (& certè omnino impetrare debent.) ut in eam curam incumbant, nulli meliùs feliciùsque id negotium conficiant.

32. Magnus interim in educatione error, quòd ea vilibus abjectisque hominibus plerumque commissa sit : vel quòd hi quibus commissa est, eo nomine viles censeantur. Vir doctus & eruditus, si fortè hanc provinciam susceperit, instar canis è Nilo, degustat & fugit.

git. Gradus est illi ad sacerdotium opimum, aut instituti parùm prosperi subsidium, & quasi ex naufragio tabula.

33. Dura sanè provincia, & res magni momenti, hominem bene instituere, ejúsque ingenium formare: Nullibi tamen utiliùs quis operam insumpserit, quàm in illà Spartâ aut per se ornandâ, aut in præceptis eâ de re tradendis.

34. Habent aspredines suas gemmæ, quæ politurâ tolluntur, habent & maculas, quæ substrato foliolo illustrantur: Nascimur impoliti, Curaturâ honestâ, & liberali institutione emendamur.

35. Sed maturè, sed tempestivè inchoanda erit institutio; non dico ab ipsis incunabulis, verùm pro recens natis, imò nondum natis solliciti erunt parentes. Quandoquidem eorum incommodorum magna pars, quæ vitam humanam cruciant, eámque ærumnosam reddunt, etiam nondum natis inusta est. Ut feges & proventus terræ annuus, etsi aliis insuper causis incommoda sua, nempe cœli & auræ intemperiei, ipsiúsque soli infœcunditati & sterilitati, sementi tamen malè factæ præcipue debet. Et in sobole humanâ pro parentum temperantiâ aut intemperantiâ, (etsi alia etiam subsint causæ,) crasis & constitutio nativa varia est, mores & ingenia discrepant, & vitæ ratio diversa est.

36. Hominem libidini aut intemperantiæ deditum, bestiam vulgò appellamus, asperè quidem satis, sed admodum improprie: Quid enim brutis temperantius? rarò ultra satietatem vescuntur, & vel sponte suâ, vel curâ nostrâ, statis temporibus coeunt. Cognationis quidem nullus iis intellectus, (quem tamen equis tribuunt nonnulli :) Virtutis aut vitii nulla ratio, quia illis nulla lex, nullum interdictum. Sine delectu miscentur, nec concubitus ullus iis vetitus. Sed & sætus suos mirâ diligentia enutriunt. Solus homo hic legibus adversatur, & enormi libidine ductus, posthabitâque sobolis curâ, sæpenumerò *ma-la via stammina* ducit, prolem degenerem, turpem, infelicem alteri seculo tradit; Ut magis ex usu rerum humanarum foret, eam nunquam extitisse.

37. E tenello quidem & subtili stamine corporis humani fabrica contextitur, Utpote quod humore quodam albugineo aut coagulo primùm constans, mox fibrillis, membranulis, distinguitur: tandem in viscera, artus, membra protuberans, idoneam iusti corporis compagem induit.

38. Dum materia adhuc tenax quodammodò, sed ductilis est, spiritus intus agens, mechanicum generationis principium, eam efformat & fingit.

39. Spiritus ille *ἐνέργειαν* Θ, omnia ambi-

ens, undique diffusus, sui domicilii architectus est : Membrorum ideam & principia quæ in se habet exerit, materiæ compagem laxat, ejus particulas evolvit, explicat, & in motum abripit, ut vitæ munia obeant : Ut curiosè eâ de re philosophantur eruditi. Quorum in messem parciùs ego falcem meam immittere debeo. Nec mihi succenseant Æsculapii filii, si paucula insuper ex eorum placitis huc transtulero.

40. Proinde de re adeò tenerâ, sed quæ demum in compagem adeò nobilem accrescat, summâ diligentia opus est : Ne præ enormi aliquâ intemperantiâ, vehementiori affectu, motu quovis inordinato, gestu indecoro, aut appetitu absurdo, labes quædam ac intemperies corpusculo aut animulæ imprimatur.

41. Atque eò robustior erit proles, eò faciliior enixus, quò validius fuerit parentis corpus. Ad conciliandam autem firmitudinem ad conservandam sibi & foetui sanitatem gravidæ licebit primis quidem mensibus quiescere, & quasi statariam agere. Quum verò ad pariendum vicina fuerit, idoneo motu utatur, lætam vitam degat, ambulet, aut (si vires patiantur,) aliquoties currat, gestatione, equo, vehiculo, aut navigio utatur.

42. Nascuntur autem Liberi, modò Mares.
modò

modò Fœminæ, nunc Patri nunc Matri similes, eò quòd hujus vel illius vires superaverint; Aliquoties autem similitudo transcurrere & saltum facere videtur, ita ut Avis, Proavis, Atavis similiores nascantur, propter imaginationis vim : Ob vagas & transcurrentes Cogitationes effinguntur plerumque similitudines, & miscentur. Atque ideò major est in humano genere Vultuum dissimilitudo & varietas, ob ingeniorum varietatem, animi vim, & Cogitationum velocitatem, unde Multiformes notæ imprimuntur.

43. Ut lacte materno nutriatur Infans, ipsa natura quodammodò postulat : Est enim illud Alimonix cui in utero materno assueverit simillimum, & maximè congruum. Atque si sana & vegeta sit mater, præbenda omnino erunt Infanti sua ubera ; sin ea debilis aut morbida fuerit, utiliùs adhibetur nutrix aliena : Sed ingeniosa, robusta, fuculenta, decora, probè temperata, laudabili Corporis habitudine, & Moribus probatissimis ornata. Mirum enim quantum ipsi Infantes nutricis suæ gestus, nutus, oculorum motus imitentur, quinetiam ipsos Mores ipsùmque ingenium assument, & postea moribus suis exprimunt.

44. Habent infantes Cogitationes & Observatiunculas suas, etsi nondum per ætatem communicare & aliis notas facere queant ;

Ex vagitu quidem, ejulatu, & inquietudine
fensa eorum quodammodo dignoscunt Nutri-
ces, unde rebus oblati periculum faciunt,
quod si quieverint, rectè se obtulisse norunt.

45. Vagitus autem eorum & ejulatus, (qui
illis pro exercitatione est,) tres plùs minùs
annos manet, quæ non est exigua vitæ pars,
si rectè administratur, ad benè beatèque vi-
vendum. Temperandus certè erit iis ejula-
tus, non autem prorsus cohibendus; mode-
ratus enim tantum abest ut noceat, ut eti-
am plurimum profit: pectus enim dilatat,
partes vitales corroborat, humores noxios
(si qui subsint,) idoneâ Diaphoresi discutit,
sanguinis Circuitum promovet, Spiritus re-
fides excitat, calorem auget, alimentis di-
gerendis inservit, repletionis vitia corrigit,
& animum ipsum mirè serenat. Immodicus
autem exūccat, calefacit, tristes, acerbos,
morosos reddit. Regimen ergo hîc adhi-
bendum censemus, uti etiam in motu & te-
nelli Corporis agitatione, & gestatione. Ne-
que enim Infantum corpora, nequidem non-
dum natorum, absque motu idoneo & exer-
citatione, sana & vegeta diu manent.

46. Motu enim calorem ingenitum exsus-
citamus, Spiritus sopitos aut torpidos eri-
gimus, ipsique Menti generosam indolem
conciliamus. Quod quidem non modò in
Infantibus (de quibus præsens Sermō est,) fed

sed & in pueris, & ætate prove&is observare licet.

47. Quum enim sanguis, atque spiritus, quos ad obeunda Corporis Animisque munia Natura designavit, statis temporibus moventur, & choreas ducunt, pabulum etiam & relaxationem expetere & expectare solent: Sanitatis cardo in eo verti videtur, ut his temporibus pensiculatè observatis, omnia iis administrentur, quæ exposcere soleant, nempe motus aut quies, pabulum aut laxamentum, prout ratio exegerit. Neque enim libere diffluere poterit Sanguis, assiduâ tristitiæ interpellatione repressus, sed torpet quodammodo, aut circuitum suum tardè, graviter, & molestè peragit. Proinde ut nec nimio labore, ita nec assiduo dolore aut tristitiâ Corpus fatigandum, aut supra modum debilitandum: Quin rei Naturâ suâ infirmæ & caducæ, ita indulgendum, ut animi operationibus peragendis labens & lætum interserviat.

48. Quoniam verò varium vitæ Genus plerique agimus, fieri non potest ut hæc ad amissim observentur, quin à consuetâ regulâ aliquoties deflectemus: At sanè quantum fieri potest, observabimus, & quum erratum fuerit, supervenienti curâ emendabimus. Sunt equidem relaxationes tempestivæ, oblectamenta, & voluptates cum Honestate con-

junctæ, sapientibus condimentum, stultis pabulum.

49. Humanæ vitæ vehicula, somnus, vinum, amicus, Philosophia: Proinde qui domum tempus exposcit, & ratio patitur, animum remittere, & bonorum Societate se oblectare solent; qui hominum frequentiam gaudent, Hi plerumque bene morati, honesti, omnibus gratissimi: Prodigii fortasse, aut ad rem minus attenti sunt; raro aut nunquam perduelles, parricidæ, aut iis criminibus dediti, quæ consilio occulto, & machinationibus clandestinis foveantur. Contra, desides, tenebriones, qui Societatem & hominum Convēntus fugiunt, & latebras quærunt, male morati, malè feriatī sunt, & si accesserit Ingenium & Audacia, rerum novarum studiosi, conjurationum & proditorum authores; Reipub. pestes.

50. Infantum corpora fasciis constringere pro more Nutrices solent, sæpe quidem non sine incommodo: Ex fascialibus enim nimium arctis, membrorum distortio, vasorum compressio, & coarctatio, pectoris restrictio, respirandi difficultas, & alia ejus generis incommoda oriuntur. At liberam respirationem nihil ad sanitatem confirmandam utilius: Quum reciproco aeris hausti & redditū motu vita conservetur.

51. Infantes rebus gratis & non gratis, jucundis

jucundis & acerbis intersint, ut formidabilia sine tristitiâ & pavore intueantur. Sunt qui manduco, formidine, larvis & terriculamentis pavorem incutiunt, eosque perterrefaciunt: joco quidem, sed non sine gravi noxâ. Hinc enim in quibusdam hominibus animi abjectio, & consternatio, imò mira rerum quarundam detestatio; quæ non aliundè orta videtur, nisi quòd Infantes ejusmodi rebus offenderentur, accrescente simul cum annis averfatione quâdam, seu Antipathiâ, sed occultâ & obscurâ, ut in incognitis & arcanis numeretur.

52. Pauperum filii qui omnia pati solent, famem, sitim, calorem, frigus; saniores, robustiores, plerumque & alacriores, quàm nobilium & Generosorum, qui mollius domi tractantur.

53. Qui suæ spontis est, & bene valet, varium Vitæ genus agat, nullis se diæteticiæ legibus obstringat, nullum Cibi genus fugiat, quo homines utuntur. Modò ruri esse, modò in Urbe, sæpiùs in Agro, quiescere interdum, sed frequentius se exercere debet.

54. Vescantur sæpiùs Infantes, sed cibo modico, leni, & infra satietatem; quò debitis gradibus coctio celebretur. Cibi leves ac tenues, miram sensibus perspicuitatem tribuunt, Ingenio acumen & perspicaciam conciliant: Immodici, vel nimium crassi,
corpus

corpus inferciunt, pectus & partes Vitales coarctunt, Crassitiem quidem augment, sed proceritati impedimento sunt ; quinetiam Cerebrum obnubilant, & Ingenium obtundunt.

55. Dicunt populares mei, Filiolis suis in omnibus ignoscendum, iis omnia licita esse debere, priusquam septennes fiant : Unde lasciviam, procacitatem, & maleficia eorum tanquam res ludicras (quibus mox vale dicturi sunt,) fusque deque habent, tantum non mirantur, & laudant. Sunt etiam qui Mendaciolis eos assuefacientes, & quum malefecerint, excusare & inficias ire docentes, aut (quod eodem ferè recidit,) non prohibentes, joco quidem, sed errore pessimo, serio delinquendi, & audacter Mentiendi incaute fundamenta jaciunt.

56. Proinde ad bonos Mores efformandi, dum fasciâ medii accinguntur, eâque penduli ad ambulandum promoventur : hâc ipsâ ætate, atque his annis, Bonæ indolis & probitatis Fundamenta certissimè & firmissimè ponuntur. Nam si eâ Ætate, & iis Annis nequam & petulantes fiunt, qui negliguntur : (ut assiduo usu compertum est ;) etiam honesti & bene morati fieri poterint, si quis rectè tractaverit. Est enim iis ingenium sequax, & in utramque partem flexile ; tanquam *Hercules Prodicus* in bivio constituti sunt, hinc
virtute

virtute suadente, illinc voluptate trahente, unde in hanc vel illam partem transire licebit. Vimen molliusculum facilè flexeris, rigidum ægré. Digitos teneriores citharæ interstitiis & chordarum epitoniis facilè applicabis; ita ut sponte suâ quodammodò incendant: at robustiores factos difficillimè nec sine magno negotio ad ejusmodi motum adiges. Dicunt Agricolaë, maturam sationem aliquoties decipere, seram semper malam esse.

57. Quum jam risu cognoscere matrem, quum suos dignoscere & balbutire cœperint Liberi, intersint (etsi nondum per ætatem intelligant,) Sacraë lectioni, Precibus, & hujusmodi Mysteriis, ac Ceremoniis, quæ pro more cautè & religiosè celebrantur. Assidua enim rei iteratio, & repititio, Meditationes quasdam incautæ parùmque sentienti animulæ suggeret.

58. Ritibus & Ceremoniis quibusdam vendis, (oculorum auriùmque oblectamentis,) vagi & instabilis animi, non modò puerorum, sed & ætate provectorum, in sacro Divini numinis Cultu eriguntur, & excitantur ad magnum quiddam de Deo cogitandum; neque tam vivâ voce, quàm signo externo docetur Vulgus: In rebus à sensu remotis, quasque non intelligit, quales sunt Religionis articuli; auditâ Verborum ambage, dictis

dictis annuit, & Fidem fortassis adhibet, sed instabilem, & evanidam: Quin signi alicujus aspectabilis Observatione iteratâ fidelius monetur. Sublatis itaque Ceremoniis, ritibus Solemnibus, & visibili Divini cultus apparatu actum erit de Religione: Saltem ejus splendor minuetur, & idonea Pietatis adminicula tollentur. Quicquid homines vel tantillum à malo cohibet, & in officio continet, (ac quam rem non parùm conferre videntur Ceremoniæ Sacræ,) non est id temerè immutandum, nedum abrogandum: Quamvis animus probè constabiliendum, non una ancora suffecerit, Varia subsidia conquirenda sint, quæ si non intus & in animo reperiantur, aliunde accersantur.

59. Non sanè, cujusque est mero mentis intuitu, & contemplatione ad Deum ascendere, Cœlestia cogitare, Virtutem amplecti. Ad miniculis opus est, præcepti simul & exempli, quorum utrumque in Institutione Pietatem & bonos Mores necessarium, & quidem exemplum maximè. Hoc enim potius quam illo maxima pars hominum edocetur. Quum animo nihil utile proponatur, in quo se seriò intendat, hæret in eo quod obijcit præsertim si sensibus adblandiatur. Hinc per erit otio aut ignavâ operâ tempus terunt, si comites nacti sint improbos, animum a deteriore partem applicant, & crimine se

nequitia aliquâ hærent impliciti. Quod si ab ineunte ætate altas radices egerit improbitas, irritus erit de reformandâ vitâ, & in melius redigendis moribus conatus; saltem non mediocris erit operæ, consuetudinis quæ in alteram naturam transivit vim eludere. Ubi verò quis ad pietatem & bonos mores tempestivè institutus, & exemplo quasi manu ductus fuerit, ibi maxima pars incommodorum cavetur, quæ neglectam educationem certissimè sequuntur.

60. Peccata quævis enormia, parricidia, perduelliones, furta, latrocinia, coram puero sæpiùs damnentur, & eorum interitus qui hisce criminibus tenebantur, identidem in memoriam revocetur. Hic enim puerum terere expedit. Si quid indecori acciderit, si quid intemperantiùs aut minùs cautè dictum, (ut in rerum domesticarum turbâ & tumultu fieri solet,) excludatur omnino puer, nec auditor aut spectator intersit. Prudentissimè dictum est, *maximam deberi puero reverentiam*. Nempe coram Sene ideo quisque decorè & modestè se gerere debet, nè quid mali aut indecori cernatur, At coram puero (id quod multò majus est,) nè quid mali addiscatur. Contrà, doctorum insigniùmque virorum studia, facta, virtutes commemorantur, & pro merito celebrentur. Ex repetitis horum laudibus, præmiis, & honoribus, facillimè ingenera-

nerabitur in animo puerili virtutis & bonarum
literarum amor.

61. Neque ferendum erit, ut famula pro-
cax, aut delira quædam anicula, ferulam &
scuticas crepitando, literarum odium (ut sæ-
pe fit,) animo incauto imprimat. Nequam
& inurbanis servis, non est quicquam perni-
ciosius, aut honestæ institutioni magis ini-
micum: Qui dum pueris assentantur, &
majori obsequio se accommodant, quam ali-
quibus obsequii nimis officiosi incommoda per-
specta sint, facillimè eorum animos sollicitant
incautis ingeniis fucum faciunt, & quâcunque
lubet alliciunt.

62. Sæpenumero ipsi parentes non modò
imperii fræna remittunt, sed & præ nimia
lenitate, potestatem & imperium in liberos
quodammodo abjudicant, & rejiciunt, & ip-
sis liberis adjudicant, aut permittunt. Quo-
ubi fit, ibi necesse est pessimè procedere e-
ducationem; Hinc sæpe usu venit ut nobile-
orum filii in bonarum literarum studiis mi-
nùs promoveant, quàm pauperum & prole-
tariorum; Utpotè qui luxu & molliæ ener-
vati, & domi imperium quoddam usurpan-
tes; disciplinam scholasticam graviùs ferant.
Et quamprimùm mores prave deposuerint
& ad bonam frugem se receperint, (&
fortè unquam se recipiant,) amoveantur, &
aliò commigrant.

63. Nam ejusmodi parentes, quum ipsi otii nimium amantes sint, ita & suis otia quaerunt; unde circumforaneum aut grammaticastrum nacti, qui novam & compendiosiorum aliquam docendi methodum profiteatur, (ut factitare solent ejusmodi homines,) hunc deprædicant, hunc miris laudibus efferunt, sed minimè duraturis.

64. Compendium iis fortasse subsidio erit, qui prius tradita & meditata, præ instabili memoriâ amiserint. At in principiis scientiæ cujuscumque tradendis, & in fundamentis ponendis, omnino dispendium est. Et qui enchiridiis quibusdam, nomenclaturis, seu *linguarum januis* (uti vocant,) contenti, miram in linguis ediscendis celeritatem & certitudinem professi sunt; nunquam (ut opinor) hisce commentariolis sive commentis suis, scopum aut destinatum finem attigerunt. Nam memoriæ non bene consulitur, ubi textura idonea & perspicuitas desiderantur, ut in omnibus ferè compendiis. Angusta atque arcta vocabulorum constipatio memoriæ inutilis est, & inidonea; Ut constipata & conglobata acies spatia pugnandi perdit, & sibi impedimento est. Brevitas etiam obscuritatem parit, nec genuinam vocis cujusque vim & significationem capere possint, qui nimium compendiosè instituuntur, & quibus quasi conferto agmine voces occurrunt.

Quin

Quin & in ejusmodi vocabulariis, voces tantum primitivæ qualicunque texturâ consumuntur: particulae autem, & elegantiores loquendi formulæ (in quibus tota ferè linguarum vis & proprietas cernenda est,) in ejusmodi compendiosâ verborum serie omittuntur, certè earum narratio & explicatio negligitur, aut parùm excolitur. Ideoque tam qui docent, quàm qui eo modo docentur, ad tempus mirè placent: brevi flaccescunt; Et sanè tralatitia hæc docendi methodus, quæ seculo nostro in scenam prodierat, Aliquandiu se ostentavit, & superbè incessit. Exiit demum, & jam penitus evanuit. Immo bonus ille senex, qui triginta fere annos in adornandâ hâc methodo elaboraverat; tandem *sapientiæ ventilabro* excussam retractavit, & opinioni non respondisse confessus est.

65. Pueris elementa literarum domi, quasi per lusum tradere, non abs re foret. Ea enim ætas & faciliùs ediscit, & feliciter retinet, quæcunque obiter & quasi aliud agentibus tradita sint. Ad scholam autem elementarem quò citiùs mittantur pueri, eò meliùs. Parùm fortasse promovebunt, esto, at eò quiddam non in deterius ruere, aut indulgentiâ domesticâ corrumpi.

66. Ea est ingenii humani pravitas, ut ad malum procliviores simus, quàm ad bonum. Pertinaciùs etiam hærent mala, Bona faciliùs

in pejus degenerant, mala ægrè ad melius transcurrunt. Unicum in honestâ & tempestivâ institutione remedium. Præceptoribus, (addam & sacris oratoribus, & magistratibus,) etsi pauci obtemperare videntur, quantumcunque tamen id est quod efficiunt, non est contemnendum; Absque iis esset, longè major esset morum corruptela.

67. In minorum gentium scholis, ubi elementa ediscunt qui artibus inferioribus operam daturi sunt, aut ad scholam grammaticam viam sternunt, quædam, (quasi casus omissi,) desiderari videntur. Ea autem partim autoritate publicâ, & legibus latis, partim curâ privatâ, doctorum studio, præceptorum consensu, & consilio, suppleri possint.

68. Et leges quidem earum numerum constituent, loca iis maximè idonea, & earum moderatoribus dignam mercedem, præmia digna assignabunt.

69. Sed sine lege aliquâ, privatorum hominum consiliis & impensâ fieri potest; Ut auditorium amplum sit, & capax docendi locus, etsi non multis capiendis destinetur, quo liberiori aere fruantur, & strepitus minuantur. Utque insuper ornetur undique picturis, tabulis arithmeticis, geographicis, historicis, & si quæ prætereâ comparari possint. Hinc enim obiter & quasi aliud agentes, non-

nihil observabunt atque ediscent vel mediocriter ingeniosi. Nec parùm ea res conferet ad judicandum cujusque ingenium, & naturæ ductum, prout in hanc vel illam tabulam obtutum dirigat.

70. E libellis vernaculis qui Pueris in elementari scholâ traduntur, Literæ otiosæ & quiescentes, (quæ in syllabis distinguendis & connectendis negotium iis facessunt, eosque multum impediunt,) eliminantur: aut diverso Characterè signentur. Hoc facillimè fieri potest, & quidem à nonnullis jam factum video.

71. In vocibus polysyllabis, lineola transversa (quam Hyphen vocant,) syllabis interponatur, unde primo intuitu Pueri syllabas distinguunt, in quibus distinguendis & connectendis, jam mirè torquentur.

72. Nullus hinc in Scholam Grammaticam migret, priusquam exactissimè & sine hæsitazione, vulgari idiomate conscriptos Libellos legere, & Sermonem vernaculum mediocriter intelligere queat.

73. Liber Rudimentorum linguæ Latinæ, qui in Scholâ elementari sæpe Pueris prælegitur, Capitulis, Commatis, & Paragraphis, item Paginarum numeris aptè dividatur; ut Magistro caput aut paginam dictante, omnia expeditè inveniant Pueruli, & oblita facile recolligant. Loci enim designatio est egregium memoriæ subsidium.

74. In scholis Grammaticis administrandis; (ut iis existimationem meritam procuremus, honorem debitum tueamur,) pauciora desiderari videntur : excogitatis tot adminiculis, & legibus quibusdam seu statutis positis, saltem in Scholis publicis, in Civitatibus, Oppidisque majoribus.

75. At forte non abs re foret, Ut in eâ quæ Pueris prælegitur Grammaticâ, exempla regulis affixa, Selectioribus quibusdam sententiis constent, quæ Philosophiæ moralis summam, & Scientiarum principia quædam simplicissima complectantur : quod adhibitâ Doctorum quorundam operâ facile fiet; Ut Juvenes simul cum Sermonis elegantia, utilia quædam & vitæ idonea ediscant. Quinetiam, ut superflua quædam, aut certe minus utilia amputentur, optarunt olim Viri complures Eruditi. Ad minuendas autem malevolorum quorundam calumnias, utilissimum fuerit

76. Ut qui aliquandiu in Scholâ moratus, nullam profectus spem, nullum Bonæ indolis specimen ediderit, amoveatur : ne sui diutius sumptum faciant, & Præceptor frustra operam impendat. Nisi fortasse Parentes, (utpote opulentiores,) id exposcant : ut ad malorum societatem evitandam, & Morum formandorum gratiâ, diutius quis permaneat, non est id iis denegandum. Nimis autem Indulgentiæ esse videtur, potius quàm Prudentiæ,

dentia, omnes sine discrimine Bonarum literarum studiis instituere. Sed cui *Ingenium* sagax, *Memoria* tenax, & stabilis ; qui *Litterarum amore* & desiderio tenetur ; qui hoc agit, & animum advertit ; qui sæpe *dubitat*, *quærit*, & percontatur ; qui *Laudæ* modeste delectatur, is Literis feliciter operam dabit. Inquisitio sollicita, & tantum non importuna, Cognitionis mater est. Et de exploratorio Ingenio nunquam desperandum. Memoria thesaurus Artium est, Et qui instat extundit.

77. Hæc autem bonæ Indolis criteria ideo hoc in loco recensentur, ut suscepto Argumento serviatur. His autem immorari, & de rebus adeò obviis præcepta dare, hominis esset otio abutentis, aut de aliorum ingenio dissidentis. Nec abs re foret, imò vero optandum

78. Ut aliunde migrantem nullus admittat, nisi Chiographo oblato, nisi Literas (quas vocant) Testimoniales, seu Dimissorias, ab eo unde commigratur, obtulerit : quò certior factus de ingenio ejus & moribus novus Præceptor, eò melius tractare queat, aut si forte indocilis aut malè moratus fuerit, (quæ plerumque transferendi, & de Schola in scholam migrandi causæ sunt, etsi alias sæpe prætexunt Parentes, ne temerè secisse videantur,) cautiùs admittatur.

79. Levia sunt hæc quidem & minuta, quæque risum fortasse movebunt Doctis, aut iis qui docti videri volunt. Esto, at nos in minutis versamur. *Plus est apud nos Operis, quam Ostentationis*, ut verissimè ait Fabius, *Plus in recessu datur, quam in fronte promittitur*. Si obstacula autem & remoras huiusmodi, quæ in primâ profectione offendunt, tollere licebit, minùs anxie reliquum iter conficiemus.

80. Præceptor ut sit *vir Bonus*, pius, moribus incorruptissimis, id unice optandum est. Neque enim improvido colono permittenda erit messis in herba, nec alterius seculi spes illi, quem culpa redarguit, qui crimine, aut scelere aliquo teneatur.

81. Ut *Prudens sit* apprimè necessarium est: Laudabit enim sine assentatione, reprehendet sine Contumeliâ, castigabit sine ferociâ, Alacris erit sine levitate, Affabilis sine adulatione, Gravis sine acerbitate, Lætus sine levitate & ineptiis.

82. Si *Doctus sit*, (quod est insuper optandum,) & bonarum Literarum studiis deditus; modum & temperamentum quoddam in studiis adhibere sciat: Qui enim Literarum intemperantiâ quâdam laborant, & Charitis non tam immorantur, quàm immoriuntur; sæpenumerò tristes & acerbi sunt, ac Docendi provinciam gravius administrant.

Quantò quis ingeniosior est, cò plerumque iracundiùs & magis anxie docet: Quum enim ægrè ac difficile intelligi viderit, quæ sibi facillima visa sint, excrucietur, & ferocit, nisi adsit Patientia, quæ si in ulla re necessaria est, certè in Institutione Puerorum quàm maximè.

83. Quum enim in bonis Literis progressus ab incrementis sensim dignoscitur, & ex intervallò sentitur, quemadmodum Animalium & Plantarum accretio, quorum minuti auctus à perspicacissimo quidem oculo sentiri nequeant; qui stata incrementorum tempora expectare nescit, imprudentiâ laborat, & magnâ cum ærumnâ docet. Si quis minùs doctus fuerit, (ut sæpe fit in ludo primùm aperiendo,) is docendo discat: Nisi sit ex eorum numero, qui nunquam ad Eruditionem perveniunt, quia jam se pervenisse putant.

84. Gravis est illa Quæstio, in utramque partem vulgò agitata, & omnium Sermonibus trita, Aspera an lenis Educatio potior? Et lenis quidem Parentibus plerisque (præsertim Mulierculis) gratissima est; ac proinde subdoli quidam, qui lucello inhiant, aut Lenitatis titulum affectant, hisce morem gerere solent, seu potius fucum facere; mira pollicentes, de profectu non admodum solliciti: Hæc contumaciam, fiduciam, sæculi nostri (si Diis placet,) virtutem, philautiam,

am, arrogantiam ingenerat. Sunt enim plerique hoc Seculo, de suorum Congressu, Sermocinatione, Gestu, & corporis Ornatu, (quæ quidem omnia cum fiducia quadam ostentare gaudent) magis solliciti, quàm de intellectu & interno animi cultu. Præsertim ubi ad Maternum arbitrium & nutum, (ut sæpe fit,) Educatio accommodetur.

85. Hinc Chorodidascali, Cantores, Fidicines, pluris æstimantur, & ampliori mercede docent, quàm Præceptores, qui formandis Puerorum moribus & ingeniis operam dant. Ita similes habent labra lactucas, quibus majori pretio Morum corruptela licet, quam Institutio proba & honesta.

86. Educatio autem paulò asperior, Viris prudentibus & cordatis magis probatur; Virtutem enim, Probitatem, & bonos Mores facilius conciliat, & felicius conservat. De neutra quicquam in genere dici poterit, etiamsi multi multa, quin utraque summâ curâ & prudentiâ temperanda est, & alterutra pro eorum ingenio quibuscum res nobis est, adhibenda.

87. Quinetiam ad Gentis cujusque genium, & Imperii rationem, accommodanda & attemperanda quodammodò videtur Institutio: In imperio Popolari, libertas, in Monarchiâ severitas magis laudatur. Hic itaque, etiam Pueri sub ferulâ paulò addictius distineri solent; illic licentius agere.

88. Solent plerique Parentes de pueris percontari, & ab iis identidem quærere, quomodo sibi placeant; quàm grata sit Schola, quam gratus item præceptor. Quòd si studiosus & honestus fuerit puer, bene se habet: disciplinam enim (etsi aliquantò asperiores,) non verebitur; Sin ignavus aut malè moratus fuerit, fallacissimum erit istud criterion; Odio enim habebit quem metuit.

89. Absit autem injustitia, & iniqua penarum distributio, sic æquiori animo calumni feretur, quæ præceptoribus nunquam defuit, nec defutura est. Ea autem *murum abenue* impavidum feriet.

90. Sunt qui pauperculos & pannosos asperrimè tractent, & unum aut alterum aliquantò sordidiorem, invenustum, vel obtusum ingenii Arcadicum juvenem quasi pro more in sublime rapiant, & malè multent, formosulos & generosorum filios etiam si gravius delinquentes, demulcent, & tantum non in sinu & deliciis habent. Missio hoc nequissimo bipedum genere, utpote prorsus inutili & damnando; Compendiò dicam, Ut non eis præceptoribus denegandum justum imperium, *ita nec debet illis nimium licere*; Ut pulchre monet Fabius. Quòd si parentes ipsi, idoneâ severitatis & clementiæ temperaturâ domi suos tractarent, rarissimâ in scholis castigat-

stigatione opus esset. Jam autem domi omnia grata subministrant, si quid asperum & ingratum adhibendum sit, id præceptoribus relinquunt. Et quod omnium absurdissimum est, etiam domi flagellum scholasticum iis minantur; Unde mirus erga domesticos amor, præceptorum autem imperia detrectant, aut graviter ferunt. Imò ætate provecti, & forte nequiores facti, eos calumniis onerant, plagosos appellant, aut *lorarios*, quales veteribus à flagellis erant.

91. Utque ad calumniam, & disciplinæ scholasticæ odium, cumulus accedat; Parentes quidam ineptè juventutis suæ maleficia pueris enarrant, præsertim quali vaftricie & improbitate præceptores suos olim tractarint, & malè multarint, unde sui facile documentum capiunt. At nemo bonus, præceptor (etsi fortè severo) maledixit unquam, aut quantumvis asperum calumniatus est. Nemo inficias iturus est, (Licet pauci rem seriò perpendant,) æstimandos esse homines, non ex rerum copiâ, sed ex utilitate quam de illis percipit respublica, Ita *qui alios erudiunt*, etiam si hoc seculo deliquium passi, *quasi stelle fulgebunt*.

92. Etsi Institutio civilis tempestivè cavet, ut omnes boni fiant, priusquàm malè agere didicerint, ac proinde remp. magis stabilire & continere videtur, quàm præmium & pœna,

na, neglectæ educationis supplementa, & succedanea: Quum tamen rarissima non in pueris tantum, sed & apud viros ingenia, quæmero virtutis amore capiantur; proponenda sunt præmia, & pœnæ, laudes, & reprehensiones, scholastici (quin & omnis) imperii fulcra & statumina: Hæc etsi pro arbitrio distribui videntur, iudicio tamen hic utitur quisquis sapit. Pace tamen meorum populum dixero, Nullum imperium stare posse, quod non sit ex aliquâ parte arbitrarium. Qui contra arguunt, arbitrarium esse volunt, sed suo modo. Dum acriter contendunt, ut omnia ad normam suam administrentur. Et si temporum vices ita mutantur, ut ad eos summa rerum deferatur, quæ in aliis vindicarant, ipsi sæpenumerò committunt.

93. Minæ contumaciores reddunt, ubi debita & promissa castigatio non sequitur. Itaque aut non omninò minandum, aut promissis standum, nec data fides hic violanda, sed iracundia utcunque temperanda, si melius se gesserit, qui deliquerit.

94. Audaculi & elati animi juvenes, rariùs laudandi, coram potiùs arguendi, fiducia eorum minuenda, & infringenda, ne animos sibi sumant, & ferociant. Modestis & subtimidis indulgendum. Studio sis animos addere, Ingeniis festinis & precocibus

cocibus frænos, Inertibus calcar adhibere decet;

95. Quidam à lusu ad studia alacriùs redeunt, alii autem tardiùs: His remissio & relaxamenta neganda, aut rariùs concedenda, illis danda.

96. Varia esse puerorum ingenia, lippis & tonsoribus notum. Quanquam ingeniorum varietas, à temperamento, ætate, regione, solo, aut vitæ instituto orta, ut gradibus accrescit, ita & tempore mutatur; atque in hominibus potiùs cernitur, ad pueros minùs spectat.

97. Sed nec minùs varia esse parentum ingenia, compertum est iis qui docendi provinciam administrant; Infelix iccirco hominum genus, quod quinque diris à *Palladâ* Græco devovetur; Et sub *Pedantii* nomine à quodam Latine traducitur. Hinc etiam *Priscianus* verberans & vapulans, ut non nemo festivo poemate lusit.

98. Et miserum esse in Grammaticâ senescere, senem elementarium esse vulgari diverbio dicitur: Sive quòd durum sit cum variis puerorum & parentum ingeniis conflictari; sive quòd in rebus leviculis, (quales sunt grammaticorum tricæ,) vitam agere molestum: Sive quòd maxima pars hominum, ut in omnes bene merentes ingrata, ita præcipuè in institutores. Nempe levioris impensæ res est aliquem contemnere, quàm de eo benè mereri. Et odisse quam dona-

re

nare vilius , constat , ut ait poeta Bilbilitanus.

99. Plerique suis nimium indulgent, & ad-
blandiuntur, præsertim matres, quæ hoc af-
fectu maximè laborant, nec eum celare, sed
palam ostentare gaudent. Celata autem in-
dulgentia nulli nocet. Verùm nec in hac
parte satis cauti sunt patres nonnulli; Novi
plurimòs nimiam patrum indulgentiam depravatos;
Mammotreptum, matris amasiuncu-
lum, ad bonam frugem pervenisse nullum
memini.

100. Multi etiam queruli sunt, impatien-
tes in pensitandis rerum momentis, & præ-
stolando successu. Nescio sanè quo fato, sed
ita plerumque fit, ut hujusmodi hominum fi-
lii rariùs ad bonam frugem perveniant: Con-
tra autem, compertum est, eorum filios opti-
mè proficere, qui in præceptoris curâ & dili-
gentiâ acquiescentes, quàm minimùm sibi arro-
gant, successum tacitè expectantes.

101. Scioli, semidocti, literis leviter im-
buti, & qui literatorum (si diis placet,) no-
men affectant, quo quidem hominum genere
nihil vivit ineptius aut inutilius; Hi licet
nec docti sunt, nec prudentes, (etsi utrum-
que sibi arrogant,) sed audaces, garruli, im-
portuni sensu suo abundantes, In præceptis
ipsi præceptoris tradendis, nimium sibi su-
munt, arrogantius se gerunt, & in eum se-
perci-

percilia distringunt, qui eorum ingenio (dicam an stultitiæ?) minus se accommodat. Vulgus tenax est & sordidè parcum, in bene merentes ingratum, quos beneficiis cumulare dum nolit, aut nequeat, minori impensâ aspernatur, & calumniis onerat. Credo sanè plerosque mei ordinis atque loci hominès li- quidò confirmare posse, se à nullis magis læ- sos aut majori contumeliâ affectos esse, quàm ab iis qui in ære suo fuerint.

102. Magna pars parentum domi cæca est, & supra modum credula, de suis animo & cogitatione mira præsumunt, unde unum aut alterum (forte maximè inidoneum,) bona- rum Literarum studiis, & scientiæ cuidam professoriæ seu questuosæ destinare, solent: Nescii, (aut parum solliciti,) utrum ingeni- um sortitus sit ad eam rem idoneum: Quòd si spe deciderint, (ut sæpenumerò fit,) in do- centem culpa rejicitur.

103. Certè Deus cuique arti suos artifices, cuivis Scientiæ suos professores, omni operi idonea instrumenta assignavit: Quòd si malè administrentur, id pravitate aut incuriâ Ho- minum contingere solet.

104. Explorare cujusque ingenium, eique munus peculiare & idoneum assignare, est qui- dem in Institutione civili palmarium. Et de eâ re curiosè Philosophati sunt Eruditi qui- dam. Verùm ad eam rem plùs confert Ob- servatio,

servatio, quàm mille Commentarii : Observatio inquam, non unius diei, aut mensis, aut anni spatio, sed diurnâ Consuetudine facta; quæ in iis locum habere non potest, qui frequentius migrant, & de scholâ in scholam transeunt. Idem sæpe his accidit, quod transfusis liquoribus, aut plantis dimotis; vis fræ quodammodò perit, & effluit, & Pueris multa è memoria excidunt, ob mutatam docendi Methodum, quæ apud varios aliquoties varia est. Intermissa est etiam Consuetudo, familiaritas, & Animorum conjunctio, quæ non nihil in Instituendo & Docendo valet, ceterè in ingeniorum examine, quod tempore fit, & plusculis Observationibus constat, instar omnium est, & utramque facit paginam.

105. Utilissimum fuerit, ut frequentissimè ea de re colloquantur Parentes, & Præceptores : Nam ex collatis Observationibus, non difficile erit conjecturam facere, quam in Arte aut Professione felicius operam positurus sit juvenis.

106. Omnia verò plerumque bene procedunt, quamdiu Præceptoris ope fretis, sine magno labore suo, sine industriâ, sine studio & indagatione, singula Pueris traduntur, unde conjectura de futuro incertior redditur. Tum demum maxima adhibenda erit cura, & renovanda de integro conjectura, quum Præceptoribus valedixerint, & liberiùs vivere incipiant,

cipiant, nam antea, (ut ait ille,) *qui scire possis, aut ingenium noscere ?*

107. Pueruli quamprimùm soli incedere & gressus figere queant, adminicula omnia, Scamna, Serperastræ, & manum adjutricem respuunt : Ita & Juvenes quamprimùm liberè vivendi potestas detur, Ducem aspernantur, adeo licentiæ studiosiores sunt quàm securitatis. Curandum itaque ne ad deteriorem partem animum applicent ; quin dirigendi, monendi, & (si opus fuerit,) coercendi, ut in viam redeant, ut animum ad aliquod studium adjungant.

108. Ingenia tarda & mediocria, quò fert Natura ducantur, in una Arte elaborent. Generosa & sublimia coerceri nolunt ; liberè expatiari gaudent, nullis terminis jus suum circumscribi patiuntur. In una forte Scientia excellere volunt, Artem unam ex professo tractare, reliquas saltem delibare.

109. Audaculi, fiducia freti, qui præsentis sunt animo, eos rebus gerendis domi bellique aptissimos pronunciabimus. Etsi enim Audacia omnium scelerum & maleficiorum Parens sit ; (quod non sine Autore dico :) verecundia autem omnium Virtutum custos : Hæc tamen si nimia fuerit, (quæ Græcis *ὑπερημία* dicitur,) rebus gerendis, quæ firmam frontem requirunt, minus idonea est. Qui abjectioris sunt Animi, modò adsit bona Indoles,

doles, Incubrationibus & meditationibus idonei sunt.

110. Alacres, amœniores Mûsas, Anxi & morosi, severiores amant. Subtimidi, & modesti, reconditis studiis, Philauti, (qui res grandes meditantur, ardua molimina excogitant,) sublimioribus plerumque delectantur. Atque hi sunt Characteres, in ingeniorum examine præcipuè observandi.

111. Sunt quidem Juvenes plerique omnes Philauti, fiduciâ pleni, nisi *ἰδιοσυγκροσία*, constitutio Nativa & peculiaris Temperamenti ratio impediat, & aliud suadeat : Unde spes in fallaces, Cogitationes inanes, desideria enormia, temporis obstetricio in lucem emittenda, quæ tamen obortum sæpenumero faciunt, unde Mentem cruciant, & inquietant.

112. Spes est futuri, Memoria præteriti. Juvenibus autem est multum futuri, saltem esse præsumunt, & sibi montes Aureos pollicentur ; præteriti parùm. Senibus contra ex Memoria præteriti, oritur potius Tristitia, quòd parùm sit iis futuri, sive potiundis Bonis, sive minuendis Malis, & corrigendis Erroratis.

113. Juvenibus omnia fervent, incalescit Sanguis, & integræ sunt Vires. Senibus contra omnia languent, torpet sanguis, & quodammodò stagnat : Vires collapsæ sunt : Illis ergo citius oboriuntur Intemperies, tum Corporis,

poris, tum Animi, citiùs etiam tolluntur : His tardiùs aboriuntur, & difficiliùs curantur.

114. Melioris tamen conditionis est senex, quia quod sperat adolescens, ipse assecutus est. Juvenis diu vivere desiderat, senex diu vixit. Certè tristitia senilis nullo modo minuenda, nisi benè actæ vitæ recordatione. Fructus enim pueritiæ laudabiliter actæ, senes reportabunt. Proinde in hâc acie quotidiani muneris, laxamenta curarum excogitare, & senectuti subsidia ex benè actâ vitâ conciliare decet. Otium enim & solitudo, & benè actæ vitæ recordatio, tutissimum senectuti portum efficiunt.

115. Moriones, quibus simplicitas est sine prudentiâ, qui dum laudaveris, fictoque obsequio delinieris, ineptè gestiunt, & operi se accingunt, ad servitutem quodammodo facti esse videntur : Horum operâ sæpiùs utuntur, qui in rebus innovandis facinus aliquod grande moliuntur; sed ut architecti fabricâ tumultuariâ, machinamentis, & contabulationibus exemplilibus uti solent, Quæ quamprimùm opus absolutum sit, ut res inutiles amoveantur.

116. Atque ut ad illud redeam quod in institutione civili palmarium dixi; Genii ductus omnino sequendus est, nisi quid insit vitii: Tum enim contrario quodam corrigendus erit. Ut si quis supra modum tristis fuerit, non is lubricationibus & studiis severioribus statim se ac-

D

cinget;

cinget; etsi Genio suo arrident, quin potius inter homines versetur. Qui leve & volatile ingenium habeat, is studio quodam severiori, utpote Mathesi, corrigendus.

117. Est enim bonarum literarum studium animæ medicina quædam, ejusque vitia corrigit. Est sua cuique scientiæ peculiaris natura, suum cuique arti ingenium. Atque ut e terrâ herbas erraticas & noxias cultura, ita bonarum artium studium, ex animo errores tollit, aut saltem minuit, semina virtutis inspergit, & ingenium si non invenit, quodammodo facit.

118. Quare sæpe fit, ut novi homines, à qui humili loco nati sint, adhibitâ institutione, & doctorum consuetudine, nativas sordes paulatim eluant; abjectum animum deponant, & generosam indolem acquirant. Contrà, qui boni sunt naturâ, sæpissimè absque culturâ idoneâ, & ex malorum contubernio & consortio mali fiunt. Quasi animi humani, perinde ac que corpora, suas haberent *σπορὰς*, seu effluvia, alios contagio inficiunt, iisque malis affricant.

119. Qualis quisque ullius artis studio recte solet, talis si naturâ fuerit, in eâ utiliùs operam positurus est. Proinde futuro Oratori nimis erit ad excogitandum acer, & paulò vehementior: Vox clara, & expedita. Philosophiæ operam daturus, erit cogitabundus,

disquirendo sedulus, & indefessus. Mathematicus erit perspicax, & ad rem attentus: Talem enim artes Mathematicæ inveniunt, vel quodammodo faciunt.

120. Quum autem *corruptio optimi sit pessima*; sæpenumero fit, ut bonarum artium studium, si ab improbo tractetur, si in ingenium inciderit pravum; animi pestis, & morum corruptela fiat; si quis ad deteriorem partem animum applicuerit. Hinc oratores mali, audaces, tumidi, ambitiosi, loquaces, in concitando populo strenui: Deturbandis quàm confirmandis rebus magis idonei. Et si Juris prudentiæ operam dant, fiunt plerumque avari, lucro inhiantes, litigiosi, In conciliabulis & circulis, si ad populum concionentur, buccinnores fiunt egregii, & ad res innovandas classicum canunt. Inspectricis philosophiæ otiosum studium, habitum corporis debilitat, animique magnitudinem impedit. Artes Mathematicæ sæpenumero pudibundos, tenebriones, tetricos, obeundis negotiis inutiles reddunt.

121. Multiplices ingenii puerilis characteres reperiri, tot ferè quot sunt in vultu varietates, nemo nescit: sed singulos enumerare imensum esset, & supervacaneum. Ego selectiores quosdam designabo; Qui licet in *hypomnematibus didactico* minoris esse momenti videantur, quidam etiam alterius ordinis, & ad rem literariam minùs spectantes, eos tamen

obiter annotare, nec inutile fuerit, nec iucundum.

122. Ut eos mittam qui in summo & imo gradu consistunt, eximie ingeniosos, & egregiè stupidos: Sunt qui celeriter ediscunt, quum sermonem in numerato habeant, quæcunque edidicerint, mirâ fiduciâ eloquuntur. Aliis animus est reconditus, nec sermo admodum expeditus, sed iudicium rectum; qui morâ adhibita acrioris ingenii specimina edunt.

123. Quidam magno conatu parùm proficiunt; alii levi operâ grandia assequuntur. Nonnulli incuriâ laborant, alioqui non contemnendæ indolis. Quidam sublimia meditatur, & supra vires se exerunt. Multi in agustas damnati cogitationes, in levibus se decunt, nihil nisi vulgare, parvum, & plebeum sapiunt. Quidam incitato passu, alii æquabilincedunt. Hi verba grandia affectant, in æmænitates quærunt. Sunt qui expeditissime inveniunt, & suoapte ingenio excogitant: Alii prius excogitata accuratè componunt, & in ordinem degerunt. Nonnulli identidem aliquam novi excogitant, alii circulo quodam ad eandem rem redeunt.

124. Ingenia quibusdam elegantia & cinnâ sunt, qui in rebus leviculis acumen edunt in seriis & aliquantùm arduis, nihil agunt: novacula, quæ pilum dissecat, à solido quavis retunditur. Sunt contrâ, qui in leviculis

inſcitè & inconcinne ſe gerunt, in nugis nihil ſunt ; in ſeriis acuti & ingenioli. Hos, quò plùs iis aſſueveris, eò magis probabis, Illi, veluti malæ merces, ſuperficie tenus lævigatæ, aut ementitæ & adulterinæ gemmæ, primâ ſpecie fucum faciunt, ſed mox ſe produnt & ſpernuntur. Hi profunda flumina referunt, quæ tacitè ac ſine murmure fluunt ; Illi rivulos, qui jugi ſtrepitu, & perenni ebullitione ſcaturiunt.

125. Quidam mala præcocia referunt, quæ dulcedinem quandam præproperam acquirunt, ſed languidam, & evanidam. Fructus autem duraturi dulcedinem morâ acquirunt, poſtea ſiunt mites & jucundi, ætate acerbitem minuent. Qui naſcuntur ſtatim molles & uvidi, non maturi mox ſiunt, ſed vieti & putres. Et quod in fructibus, idem in ingeniis obſervare licet. Laudabilior puer qui ultra puerum non ſapit ; qui omnia decorè pro eâ ætate agit ; ſenſim & gradibus ad majora aſſurgit. Ejusmodi ingenia utiliſſima plerumque reperiuntur. Et medii ingenii homines, qui nec animum diſpondent, nec nimiùm ſibi arrogat, utiliſſimi plerumque in obeundis negotiis, & Reipublicæ muniis adminiſtrandis, ſoli ſerè verſantur. Abjeçti animi, deſpicibilis ingenii Homunciones, inutiles ſerè ſunt. Qui ſummo ingenio pollent, plerumque ſibi nimis placent, & altùm ſapiunt, nec rebus gerendis ſe accommodant,

commodant, nec hominum ingenio & moribus.

126. Ingenium ante annos solers, & nimis cautum, plerumque malè audit, & procedente ætate in malitiam abit. Qui ingenio sunt egregiè malefico, qui naturâ sunt sævi, & treculenti, nescio cui bonæ rei inserviant, nisi quòd ob res bellicas celebrentur; & aliquando imperium occupantes, flagella fiant castigando seculo, & in melius redigendis moribus non inidonea.

127. Nihil autem esse in humanis stabile, quis nescit? Mutantur etiam ingenia, & mores, pro ætate, loco, vitæ instituto, honorum decursu, & reliquis vitæ circumstantiis. Si fortè in quibusdam non mutantur; tamen læpenuerò fit, ut qui magnam nominis celebritatem apud vulgus obtinet, famæ suæ superstes est: Licèt enim constans & sui similis permanferit, imò magis magisque indies in studio & studio virtutis promoveat, ea tamen est hominum levitas, ut quem non ita pridem celebrarint, mox vilipendant.

128. Varietatis hujusce in ingeniis humanis rationem, Mathematici quidem ad astra referunt; unde juxta eorum placita, Saturnini, tristes, stabiles, cogitabundi sunt. Joviales, benigni, læti, justi. Martiales, contentiosi, audaces, ambitiosi. Solares, ingeniosi, sapientes, mansueti. Venerei, hilares, quieti, misericordes. Mercuriales, acuti, dociles, instabiles.

stabiles. Lunares, taciturni, leves, vagi.

129. Medici temperamentis & humoribus ascribunt, unde Sanguinei, agiles, hilares, benigni perhibentur. Biliosi feroces, & temerarii. Phlegmatici, tenaces, sed minus expediti. Atrabiliarii, tristes, cogitabundi, sed sæpe reconditè ingeniosi existimantur.

130. Neque sine ratione ita philosophari videntur; nam ut aqua venas metallicas transiens, earum succum & saporem imbibere solet, atque ut humor terræ roscidus, & alibilis, pro variâ plantarum texturâ, variè sapit: in absinthio amarescit, in glycyrrizâ dulcescit, in oxalide acefcit, in totâ malvarum specie mollescit: in aliis pungit, urit, aut alstringit: Ita & Spiritus animalis, dum in corpore variis humoribus repleto diversatur, variè pro cuiusque humoris dominio affici solet.

131. Quod oculus corpori, hoc intellectus animæ, atque ut oculus interpolito opaco aut colorato alucinatur, ac minùs clarè cernit: Ita & intellectus interposito impedimento humoris noxii. Proinde ejus Cultura in eo præcipuè consistere videtur, ut removeantur prohibentia, corrigantur humores noxii, præjudicia ex Ætate aut Educatione orta, tollantur. Et humores quidem noxii Medicinâ tolli aut saltem discuti & attemperari poterint; vel fortè melius Gymnasticâ, quæ olim in artibus ingenuis & disciplinis annumerata est:

Hanc quisque in suum usum transferre poterit.

132. Præjudicia autem quibus ab Ætate aut Institutione erroneâ capti, nosmet admiramur, & plus æquo nobis tribuimus, non melius tollentur, quàm Veteres autores legendo, & inter Homines versando, hinc enim dignoscere licebit, bonam mentem rectamque rationem cæteris etiam distribui, non in nostro peculio numerandam esse. Monebimur etiam de nobis & seculo nostro modestiùs judicare, ne retro elapsa secula quasi inculta & inerudita damnare. Hinc inquam modestiùs de nobis sentiemus, aut in eos qui præcesserint minus ingrati erimus. Si neutrum à nobis impetrari queat; verendum erit, ne qui de Majoribus triumphari volumus, ludibrium posteris debeamus: Ita lege Talionis retributio nobis fiet.

133. Historici & civilis doctrinæ Scriptores, ad Regiones, earumque situs, leges, & consuetudines, morum ingeniorumque discrimina referunt. Septentrionales, quibus cælum asperius, & cibus plerumque crassus, Spiritus quidem & animos validos ac feroces in corpore robusto habent: Sed naturâ rigidi & truces sunt; Meridionales, quibus cælum est mitius, & qui Spiritus habent tenuiores, agiles atque sagaces sunt. Insulani, qui mixtum varium & mutabilem hauriunt aera, mobiles, inconstantes, rerum novarum studiosi

plerumque sunt. Pactam fidem subinde violant: jurant facilè, & mox ejurant; quasi conceptis verbis tacto Calendario annuo jurassent, ut nonnulli observant. Utinam hinc vani essent.

134. Nec non ad Principum mores, eorumque qui cum Imperio sunt; hos enim Populus imitari gaudet, Ut rotæ minores in machinis automatis, majoris cujusdam motui accommodantur, Et freta Oceani motum sequuntur. *Totus mundus Histrioniam facit*, ut ait Satyrus; & quotusquisque est qui non *scena serviat*?

135, Dignosci volunt cujusque indolem atque ingenium Physiognomones ex vultu, aut Typis & Lineamentis ibi exstantibus: Arte quidem non prorsus vanâ aut damnandâ, si quis rectè tractaverit. Verùm à doctis neglecta, aut parùm exulta, & à circumforaneis quibusdam impostoribus traducta, illa male audit. Hominis probi & ingeniosi staturam volunt æquabilem esse, & castigatam: caput leviter gibbum, temporibus nempe expositis, ante & retro prominentibus, & protensis, sub utrâque aure leviter depressum, ut si Globum è cerâ leviter utrinque comprimam; Oculos vegetos, claros, nec supra modum prominentes, nec in orbem reductos; Capillos subnigros, vocem claram, & expeditam.

136. Sunt qui ex collatione Vultûs humani
cum

cum bruti alicujus Vultu, inde ingenii & morum similitudinem arguunt: Unde eum cui truces & micantes sunt oculi, vultus torvus, humeri patuli, pectus amplum, capilli leviter à summo inflexi, & in extremâ orâ subcrispi, strenuum atque magnanimum quasi leonem dicunt. Oculi patuli & demissi, retracti, quiescentes, & tantum non immoti, cum pupilla latâ, humilem & mansuetum tanquam ovem denotant; simplicem, bonum, sed bonitate illâ quæ ferè malè audit. Vultus argutus & speculatorius, pupilla coacta, oculi instantes, porrectè explicati, mores vulpinos indicant. Qui elatâ cervice incedit, cui oculi prominentes, supercilia arcuata, caput erectum, pectus amplum; feroculus, insolens, fastidiosus censetur, ut equus. Ita quasi non norimus nos inter nos, à belluino genere indicia desumunt. Qui admodum angustæ frontis, & crassæ simul ferobesæ naris est, instar suilli generis ineptus & hebes perhibetur.

137. Exeunt quidem in vultum humanum morum vestigia; Extant inibi typi quidam, ac notulæ, latentium affectuum indices: Et qualis quisque est in aliquo animi affectu, Qualitercunque vultum componit, aut ejus musculos habeat sitos, talem hunc meritò judicamus, cui natura ejusmodi vultum dedit.

138. Ipsum vulgus, affectus animi saltem vehementiores ex vultu dignoscere solet: Et co-

veniam

rendum esse ab iis quos *Deus* signavit, vulgari adagio dictum est. Signa quidem physiognomonica, & vultuum characteres, facilius intelliguntur, quàm explicantur. Hilarem tamen dignoscimus ex vivida sanguinis diffusionione, jucundà vultus erectione. Tristem ex spirituum & sanguinis reductione, & vultus demissione. Iracundum ex subitâ & tumultuariâ sanguinis agitatione, & vultus distortionione. Subiannatio, quum nares sursum contrahuntur, obliquè corrugantur, aut ad latera detorquentur, nauseabundum, contemptorem indicat. Frons etiam rugosa & caperata anxium aut iracundum notat: Erugata & exporrecta, hilarem, vel efronem.

139. Nisi quis internos animi motus celare, & affectus ex alto dissimulare studeat; ita ut nullus eorum typus extra pateat, quod nonnulli, (saltem ad tempus,) facere solent.

140. Verùm in dignoscendis hominum moribus, & ingeniis; Vultus sæpenumerò mendax est, & corporis figura admodum fallax. Grandes enim & deformes aliquandò probi & ingeniosi reperti sunt; *Rem magnam præstant quod boni sint.* Contra, decori & speciosi non rarò malè morati, & stolidi; Quod tamen domesticæ tractationi & educationi aliquoties tribuendum. Ea enim in utramque partem plurimùm valet. Nam & capitones, strabones, cernui, gibbosi, aut alio quovis modo deformes

formes & distorti, tametsi naturâ mali sint, & plerumque impostores, versipelles, obsceni aut effrontes fiant: Curaturâ tamen & institutione honestâ, sæpenumerò ad bonam frugem se recipiunt, unde reipub. utiles & idonei sint.

141. Quidam vultus habent non modò varios, & Proteo mutabiliore; sed perpetuò mendaces; Et vultus & sermo iis coactus & simulatus est; Ita ut aliis prorsus sint moribus, quàm præ se ferunt. Hinc proverbio monemur, *fronti nullam fidem adhibendam esse*, propter multiplices fallacis animi recessus, Unde mores hominum è fronte certò dijudicari non possunt, Multò minùs ingenia sua, quomodò ad bonarum literarum studia se habeant.

142. Sin observare libet, quomodò in authoribus legendis quispiam affectus fuerit, quare maximè delectetur; hinc ejus ingenium certius dignoscere licebit. Ingenium poeticum, metri concinnitate, & verborum amœnitatibus delectatur; de cæteris inter legendum minùs sollicitum est. Oratorium, verborum lenocinia, schemata, elegantiores loquendi formulas, (cæteris posthabitis,) quærit, & inter legendum observat: Item populi concursus, & actiones forenses meditatur. Philosophicum, rerum causas notat, & de iis alios identidem percontatur. Mathematicum, numero, pondere, mensurâ, calculationibus & dimensionibus gaudet.

143. Sed & qui gestit, qui lætitiâ exultat, & se quodammodo authorem fingit, aut saltem tacitus dicat, ô si essem! Quin & ejusmodi quoddam opus pro virili suâ in animo meditatur; Is bonæ indolis signa, & latentes ingenii igniculos indicat.

144. Ingeniorum varietatem qui ad examen redegerunt, eam pendere volunt ex tribus animi facultatibus, Memoria; Phantasiâ, Judicio; quæ operationes habent peculiare, atque variis artibus addiscendis inserviunt.

145. Ad phantasiâ eas artes pertinere volunt, quæ symmetriâ, figurâ, & consonantiâ quâdam gaudent; Quales sunt Scriptio, Pictura, Musica, & universa Mathesis, Poësis, Rhetorica, Militia, Regimen, Medicina practica: Et quæ lusus ingenii humani potius quàm veræ scientiæ censendæ sunt, ut Saltatio, Gesticulatio, Præstigiæ, Histrionica.

146. Memoriæ cancellis contineri aiunt Grammaticam, Historiam, & scientias omnes, quæ multis vocabulis, variis regulis, multiplici rerum enarratione vel enumeratione constant.

147. Judicio assignant Logicam, Physiologiam, Ethicam, Medicinam theoreticam, Jurisprudentiam, Metaphysicam, Theologiam; Omnes denique quæ in arguendo, inferendo, distinguendo versantur.

148. Qui enim curiosè numerorum mysteria speculantur, illis tria sunt omnia, Neque
tam

tam ad veritatis normam divisiones rerum exigere videntur, quàm ad numerorum rationem confingere : Proinde omnes ingenii dotes triplici facultate contineri aiunt, omnesque scientias eò referunt. Atqui multiplicia hominum ingenia, si non cancellis nimium arctè claudere, animùmque angustis limitibus circumscribere, non admodum idoneè tamen distribuere videntur, aut propriæ quamque facultati assignare.

149. In hisce sanè facultatibus varietas quædam cernenda est, In phantasiâ præsertim seu imaginatrice, cui vulgò oratoriam, musicam, poeticen, picturam, artes mathematicas ascribunt. *Est quidem finitimus oratori poeta; Picturæ cum poesi affinitas quædam.* Est inter musicam & poeticen cognatio. Verùm alia facultas esse videtur, quæ ad scientias mathematicas inclinat, quàm quæ ad poesin. Poetice animum emancipare videtur, relaxare, & sui juris facere, ut liberè vagetur, expatietur : Mathematicæ contra coarctare, intus detinere, ut in se redeat cogitabundus.

150. Utcunque ita philosophati sunt, quingeniorum examen instituerunt; Scientiæ præque omnes, prout vulgò traduntur, & in libris comprehenduntur, ad memoriam præcipuè spectant, & ejus ope acquiruntur; Quia regulis constant, quibus ediscendis memoria infervit. Scientia enim est systema præceptorum,

rum, seu artificialis regularum congeries, observatione collecta : Nam è plusculis observationibus, & experimentis, quæ vel industria invenerit, vel fors obtulerit, plurimæ artes confectæ sunt, ut *Inductione* patet.

151. Grammatica, quatenus rectè loquendi rationem tradit, ex usu & consuetudine dicendi orta est. Ex usu enim erat norma Loquendi, non ex norma usus. Quatenus autem Scribendi ratio est, unde Grammaticæ nomen fluxit, est merè Mechanica, nempe Ars quædam animi sensa & nomina rerum mansuris quibusdam nōtis exprimendi, quam Scripturam dicimus. Erat autem ea origine tenuis, & tantum non rudis; utpote quæ à notulis in arenâ ductis primum orta, incrementa mira sumpsit, ut facile est inventis addere : Utilissimum inventum, & nisi usus, consuetudo, & frequentia rei admirationem minueret, prorsus mirandum. Quid enim aut ingeniosius aut mirabilius excogitari potuit, quam sensa mentis, & innumeras voces characteribus pauculis exprimere ?

152. Rhetorica est præceptorum & regularum Congeries, è doctorum perorationibus, suasionibus, probationibus, omnique materiâ Rhetoricâ collecta, & in methodum redacta. Logica ex usu Argumentandi orta est; nam ex observata ratione atque formâ quam in ratiocinnii usu tenuerunt docti, excogitata sunt

sunt præcepta, & confectæ regulæ Argumen-
tandi.

153. Atque hæ quidem Artes Organice dictæ sunt, quòd regulas tanquam instrumenta conficiant, quibus mens in rerum Cognitione dirigitur. Ratione & Oratione (utrumque communi Vocabulo appellant Græci,) à brutis distinguimur: Earum usu atque exercitio sapientes à stultis discernuntur: His autem excolendis inserviunt Artes jam memoratæ.

154. Poetice similiter desinentium aut æqualiter decurrentium sonorâ modulatione primùm contenta est, & Schediasmata quædam, seu opera inelaborata ex tumultuariâ meditatione confecit. Characterismi seu descriptiones rerum, locorum, personarum, æfectuum, & siquæ sunt aliæ, communes sunt Poetis cum Oratoribus. *Est finitimus Oratori Poeta*, Est utrique sua Verborum copia nisi quòd hic ligatam, ille solutam Orationem amat.

155. Picturæ originem dedisse videtur delineatio exterioris ambitus Corporei, aut circumducta lineis umbra in terram aut parietem projecta. Omnia primùm Monochromata; postea variis Coloribus operosiora facta: Lumine atque umbrâ distincta, ex æterna Colorum excitatione & depressione. Et ex desinentis Picturæ ambitu, etiam quædam

non apparent exprimuntur ; quæque in plano jacent, eminere tamen & extra tabulam esse videntur. Quin & in superficie planâ corpora diversimodè surgere aut subsidere videntur, secundum Scenographiæ regulas.

156. Sonus autem è Chordis extentis aut cavâ Arundine casu factus, Musicæ Organicæ originem aut dedit, aut dedisse potuit ; unde decantatissima de *Syringe* fabula. Quum autem Sonus simplex & liberè erumpens minùs gratus sit, proinde ad varietatem & gratiam conciliandam, ab Artifice perito intercipitur, & mille modis temperatur.

157. Matheseos subjectum est Quantitas à Materiâ exemptilis, abstracta, aut Cogitatione separata : Ea autem quum duplex sit, multitudinis una, altera autem molis ; illam Arithmetica, hanc Geometria tractat. Quæ solæ sunt artes Mathematicæ puræ, & propriè dictæ. Musica enim est numerorum ad harmoniam Traductio, Astronomia est Geometria corporum Cælestium magnitudini applicata.

158. Arithmeticæ origo est Computatio digitis facta, unde decas Numerorum meta & periodus. In Geometriâ quin & Arithmeticâ, pleraque experimentis Mechanicis, multiplici examine, jugi Mentis agitatione patefacta sunt : Ut in Numerorum Ratione & Analogiâ, in angulorum & laterum Dimensionibus.

mentionibus. Fatentur omnes, duo & tria esse quinque : Si æqualibus æqualia addideris, æquale esse productum : Si æqualia a qualibus ademeris, residuum æquale esse, &c. Non autem priusquàm Numerorum rationem Ordinemque dignoverint. Trianguli tres angulos æquales esse duobus rectis, nemo non fatetur. Est, sed nemo Mortalium istud intelligit, priusquàm Trianguli naturam, ejusque Mensurandi rationem intellexerit : Neque ducto è quovis angulo Arcu, & lateribus intercepto ; Hinc patet, omnes Arcus sumptos efficere gradus bis 90, hoc est 180. Apparatu quodam opus est, Gradibus ad exactam cognitionem assurgimus.

159. Motuum cœlestium Descriptiones, ex plurimis Observationibus collectæ sunt, ex jugi & multiplici observatione confinguntur Hypotheses, supponuntur Circuli & Orbis quibus moventur corpora Cœlestia, aut moveri finguntur.

160. Mathesis etiam quæ Mechanica dicitur, tenui origine orta, tempore incrementa sumpsit. Ædium structura, speculatio nativis Originem suam debere videtur. Eorum solaria, horarum indices, ex arborum umbris à Pastoribus observatis primum exornata fuisse verisimile est. Quanto autem apparatu atque splendore & Ædes & Horologia jam ornantur ! In movendâ autem tollendâ

collendâ mole, experti sunt homines se vectis adminiculo plus posse, quàm nudâ manu; etsi fortasse rei rationem nondum intelligerent, Nempe *angeri moventis vires pro distantia suâ à fulcimento, sive centro gravitatis*: Hoc semel comperto, (ut ferax est inventio Humana,) adinventæ sunt Rotæ, Trochleæ, aliæque adminicula Mechanica, quæ eodem principio & fundamento nituntur.

161. Scientiæ illæ celeberrimæ, Theologia, Medicina, Juris Prudentia, quatenus sunt merè Theoreticæ, ad eandem animi Facultatem referendæ sunt, cum aliis Scientiis Theoreticis. Quatenus Practicæ & Professoriæ, nihil aliud sunt, nisi Scientiæ Organicæ ad res diversas sive ad variam materiam accommodatæ; nempe ad hominum Animas, Corpora, & bona seu fortunas.

162. Theologiæ theoreticæ seu naturalis, (quæ sola hic locum habet,) principia, provocatione ad Facultates factâ investigantur, & explorantur. Schola quidem Peripatetica mentem Humanam vasi vacuo aut rasa tabulæ assimilavit; unde ejus Sectatores doctrinam sub infusionis vel scriptio-
nis similitudine explicare solent. Rectius fortasse Platonici, qui ex Notionibus innatis seu præconceptis veritatem eliciebant, & quasi partum, obstetricio quodam, in lucem ferebant.

163. Solius hominis est seriò cogitare & ad facultates provocare ; unde solus Deum cognitionem, solus Religionem habet. In bruto generi nulla ejus notitia, Religio nullum quantum nobis dignoscere licet. Qui autem seriò Cogitandi tedium averfantur, vix ad Hominibus numerandi.

164. Spirituum natura solo Mentis nobis obtutu concipitur ; Ex Notionibus innata elicitur, aut Ratiocinio colligitur : Quia Spiritus sensoria nostra (ut in Scholis loquuntur) rarò percellunt. Percellere autem aliquando videntur, in Revelatione, & mirà rerum quarundam Notitiâ & Indicatione, quæ sunt hujusce loci, ubi de iis tantum agitur quæ mentis humanæ Agitatione eliciantur. Quoties autem Sensuum operâ in intellectu nostrum Spiritus insinuent, Quoties instant alicujus boni se nuncios præbent, aut alicujus periculi seu imminentis lethi comminatio nes faciunt : Ut ex Historiis, & Fide divinarum relatu accepimus : Hæc tamen quia rariùs occurrant, forinsecus adveniant, & finis nos sint, ad Hypomnemata Didactica magis spectant.

165. Provocando ad Facultates, innoscet, *Deum esse*, vel à priori, ut loquuntur Dialectici : Ut quum ex eo quòd Deus Ens necessarium, infertur necessitas Existendi, & quòd sit Ens summè perfectum, et

167 *Beneficium esse iis qui ipsum requirunt,*
Preces iustas nunquam irritas aut inutiles
esse : *Malos supplicio afficere,* Homines sce-
lerati etiam in hoc seculo plerumque plec-
tuntur, Gentes autem, Civitates, Corpora
(uti vocant) Politica, quibus non est Ani-
ma in statu Futuro plectenda, semper in hoc
seculo pœnas dant, Impietatis peste, Libidi-
nis incendio, Sacrilegii familiarum interitu
aut paupertate, Injustitiæ diluvio. Perjurii
pœna quidem humana est Dedecus, & toti-
us Gentis infamia : Pœna autem Divina,
exitium. Quoties enim enorme quiddam
(puta Sacrilegium, aut Perjurium,) adeo

invaluit, ut non modò Epidemicum sit, & Lege sanciatum ; (nec ejus rei sunt exempla,) non tam Hominum captum dixeris quàm Gentis : Et Gens luet.

168. *Statum fore Retributionis*, pro Vanteactæ Ratione diversum : Quod non contemnendo Veritatis argumento, apud omnium Gentium & seculorum Homines in confesso est. Hinc sanè quicquid est honesti & probitatis, inter Mortales continetur, & in terris moratur ; etsi in quidem statu explicando alucinantur mortales, nec mirum ; *Nondum enim apparet pererimus.*

169. In iis ergo quæ captum humanum excedunt, adhibendus est Cogitationis nostris modus. Infinitum & æternum est anxiam Cogitatione prosequimur, quum aliquid qui non liceat ? Mundus est τὸ πᾶν, id est universum. Ultra universum quid quaerimus ? Cur spatium Infinitum fingimus ? Cur moriuntur & intereunt animalia, continua successione manent, & mansura sunt quamvis Deo libitum fuerit ; quod nobis incognitum nec indagine ullâ deprehendi poterit, *Quid enim Deo a consiliis ?*

170. Id verò adhuc magis culpandum quod in iis rebus quæ Religionem spectant multi ferram Contentionis reciprocant, nisi

sôque Pietatis studio, Religionem obstrepere reddunt; & (quod maxime dolendum) feram & inhumanam : Dum præ Ambitione, aut partium studio, non tam veritatem sectantur, quàm victoriam : Eaque non semper obtingit Veritatem tuenti, sed ei qui ingenii Acumine, aut viribus, seu auctoritate præstat : Ut qui sudem vibratam projiciunt, aut in arcam pilam malleo propellunt, fortioribus lacertis Victoriam acceptam ferunt, non dignitati, non formæ, nec probitati, nec cæteris Fortunæ, Corporis, aut Animi dotibus.

171. Theologia autem practica, vel in publicis Perorationibus & Concionibus versatur, vel in privatis Monitis, Hortationibus, Consolationibus adhibendis, prout cuiusque Conditio postulaverit : Hoc judicii opus est, illud cum Rhetoricâ seu Oratoriâ coincidit, atque idem Ingenium, eandem Indolem requirit : Et si ab improbo tractetur, qui ad deteriorem partem Animum applicuerit, (ut supra observatum est,) innumera inde maleficia orientur, ut ex optimarum rerum abusu & corruptelâ fieri solet.

172. Medicina est Philosophia Naturalis corporibus Humanis applicata ; Praxis ejus & medicamentis Ingenio aut Casu inventis orta est : Ex medicamentorum serie seu

catalogo, Historiæ quædam seu Observationes columnis affixæ, aut Templorum Archivis inscriptæ : Hinc regulæ de simili medicamento in casu simili adhibendo. Nec in alio fundamento nititur Medicina, quæ dicitur Empirica.

173. Rationalis autem, cognitâ cujusque intemperiei causâ, simul & loco in quo bulatur, materiam morbificam expugnat. Nempe humano Corpori varia assignata sunt emunctoria. Recrementis & Humoribus persuis è quâvis præcipuâ parte amovendis, vasa quædam excretoria inserviunt: Capiti tonsillæ, Glandulæ maxillares, ductus Salivales ; Cerebro parotides ; Cordi glandulæ subalares ; Hepati renes. Et vapores quidem recrementa per Diaphoresin, Serum per renes, & lymphæ ductus, Biliosa per cystin felleam, Atrabiliaria per lienem expurgari dicuntur. Proinde qui partium structuram, & propria cujusque partis emunctoria dignoverit, materiam morbificam derivatione tollere facilius poterit.

174. In structurâ partium explicandâ, feliciter processit hoc sæculum : Ut nemo sibi ignotus esse poterit, nisi qui vult. Quis tamen quisque est qui seipsum intus in cute novit, qui Corpus, & Animam, hujus facultates, illius partes earumque usus intelligit ? Quod est proprie seipsum

cere. Externa & foris posita miramur, quum nihil nobis mirabilius. Exotica & longius distita petimus, quum domi meliora habeamus.

175. Quis sensuum suorum actiones, nedum intellectus sui operationes intelligit? Id quidem satis constat, nervos in corporis superficiem desinentes, ictum ab objectis recipere, eumque ad cerebrum usque deferre: Ut si quis citharæ chordam pulsaverit, motus ad extremam usque chordam pertingit: Quomodo verò ictus ille nervis primum imprimatur, non adeo in propatulo est.

176. Structuram oculi, & auris, & utriusque nervos ingeniosè describunt anatomici. Philosophi auditum celebrari aiunt, quum sonus vibratione quâdam & jugi fluore ad aures transmissus, per nervos ad cerebrum deferatur. Euge! quadantenus intelligo. Visionem fieri aiunt per species à re visâ seu objecto transmissas, & in oculum immissas. Sed qui species hasce (quæ vel quales fuerint,) pulchrè descripserit, *erit mihi magnus Apollo*. Nam sive species intentionales dixerit, sive secundi elementi globulos, sive tincturas, sive exuvias substantiales, ab objecto seu re visâ emanare, per medium diffundi, & in oculum trajici affirmaverit; Adhuc certè intellectui aqua hæret. In gustu quidem & tactu, res paulò dilucidior est: ubi res sapi-
dæ

de & tactiles superficie suâ ad sensoria per-
tingunt. Effluviis substantialibus olfactum fi-
eri nullus est ut opinor qui dubitet. Hic e-
nim intellectus facile se movet, & ad verbo-
rum sensa pertingit. Ubi verò verba dicun-
tur tantùm, sensum autem qui rem exprimat
nullum habent, aut obscurum nimis & per-
plexum: Ibi aut se non movet, aut parùm sa-
nè promovet.

177. In cogitatione motus quidam esse vi-
detur, non modò ab extrinseco, sed & ex par-
te ipsius animæ: Ea enim circa objecta qua
grata sint, ita affecta est, ut se exerat, ex-
pandat, & quasi in occursum eat. Contra,
si minùs grata eam percellant, in statione se
continet, aut refugere, & se quodammodò
coarctare videtur, Quæ motus indicia sunt.
Quin & objecta levia minùs premunt, quàm
quæ alicujus momenti sint: Propinqua ve-
hementiùs movent, quàm remota; & præsen-
tia quam præterita, aut futura.

178. Qui jus municipale tractant, sunt ve-
patroni & oratores, qui eloquentiâ & ornatu
dicendi facultate ad actiones forenses insti-
tuuntur: Vel Pragmatici, seu causarum cog-
nitores, qui verba, formulas, & causarum
compendia oratoribus subministrant: In his
autem præter sedulitatem, & circa apices ju-
ris versutiam quandam & vafriem, omnia
plerumque desiderantur.

179. In genere, Artes ferè omnes prout in regulas & methodum reducuntur, sunt quasi cogitationum nostrarum vincula, lis tamen admodum utilia, quorum animi vagi & instabiles sunt : Quales fere sunt puerorum & mediæ cujusdam indolis hominum. Quarè ut loris, funiculis, aut pilis stramineis suffragini appositis, equorum pullos motus quosdam concinnos docent, & tolutim ire cogunt equisones. Ita regulis & præceptis, juvenum animi (vagi alioquin & instabiles) coercentur, & ad normam quandam dicere, argumentari, numerare docentur. Probè exercitatis, regulæ & verborum formulæ (ut equis lora pedum,) excidunt : Ipsa res manet, & quasi exsuscitata animo occurrit, quoties occasio se obtulerit.

180. Sed ut finis tandem sit ; Lectis vel auditis assentire cujusque fere est. Regulas & præcepta artis alicujus intelligere & memoriâ tenere multorum. At si quis non modo intelligit, verum ad facultates suas provocando, singula expendit : Quædam insuper excogitat, & quasi de suo peculio superaddit, hunc naturæ ductu ad eam artem ferri noveris.

181. *Galenum* ferunt adhuc puerum medicinæ operam dedisse. D: *Thomam Aquinatem* in cunis avidè libros petiisse. *Vesalium* etiam puerum mures atque alia animalcula disse-

dissecuisse. Sed quâ methodo, quibus gradibus ad summum contenderunt, nec ipsi (qui soli optimè poterant,) tradidere, nec alii conjecturâ affecuti sunt : Adeò ut hinc via deserta sit, nec ullis pressa vestigiis.

182. Artibus ediscendis ut in systematis, enchiridiis, manuductionibus, regulis traduntur, sufficit memoria. Sin earum originem & naturam explorare quis velit, & peculiarem ingenii cujusque ad hanc vel illam ductum ; Provocandum erit ad facultates, Scientia propria revisenda, Gradus & vestigia cognitionis remetienda : Atque hæc omnia cum aliis fideliter communicanda, diserte & sigillatim tradenda : Ut sic inseratur scientia animo alterius, sicut crevit in suo.

183. Atque ut hujusmodi ingeniorum investigatio, & scientiarum traditio, utilis fiat : Jugi & multifariâ observatione opus erit : Plusculæ doctorum observationes colligendæ, & conferendæ : Qualia quisque indolis specimina & præfagia ab ineunte ætate ediderit. Tradant viri docti quales habuerant meditationes, quibus gradibus ad summum ascenderint, quò melius lampada tradant, aliis viam præmonstrent, & bonas artes aliorum animis insinuent. Qui temere aut solius lucelli gratiâ artem aliquam probeantur, (quod ad hanc disquisitionem attinet,) flocci faciendi.

184. Hujus

184. Hujusmodi meditationum thesaurum colligere, *Hic labor, hoc opus*. Requiritur otium, jugis & assidua cum doctis consuetudo, nostratibus simul & extraneis. Nos plerumque actum agimus, circulo scribimus, nostræ gentis institutionem tradimus, missâ exterarum gentium institutione : Unde tamen collatione factâ, res dilucidius explicari, & multa inde utilia peti poterant.

185. *Xenophon* quidem de veterum Persarum institutione, *Plutarchus* de Spartanorum ex professo scripsit. Qui autem de Germanorum educatione, & moribus copiosè scripsit, Institutionem literariam, (quæ apud illos ferè nulla erat,) *tacitus* præterit. De veteri apud Romanos institutione, pulchra quædam scripsit, quisquis autor est *dialogi de Oratoribus*.

186. Qui hodie regiones externas invisunt, aut describunt, earum situm, fluvios, saltus, montes, urbes, mores describunt : De puerorum apud eos institutione, quæ meritò dignoscenda, (quævis enim gens aliquid hic singulare, aliquid notatu dignum habet, vel ad imitationem, vel fortasse ad cautionem,) altum silentium.

187. Mihi neutiquam polliceri, imò ne sperare quidem licet, nec quisquam expectaverit, ut quæ hâc in re desiderantur, ego suppleam. Si instar cotis aliis acuendis inservierim, Hoc est quod potui.

188. Ha-

188. Habes hîc lector quæ ego carpi
 & per intervalla meditatûs sum; Atque
 ta quidem scripsi; Adeò ut in illis ordo
 methodus desiderari videntur. Quædam
 aliis dicta non intacta reliqui, quoniam
 gumento serviendum erat: Leviter
 gi, ne si singula copiosius prosequerer, non
 esset

Finis.

E R R A T A.

Sect. 54. lege coarctant. sect. 58. l. instabiles. sect.
 l. indicandum. sect. 111. l. abortum. sect. 113.
 oriuntur. sect. 132. l. triumphare.

Reliqua errata leviora sunt, quàm ut ea lig
 indicare necesse sit.

Notæ ad Sectiunculam

18. **I**nscribitur Poemation hic memoratum, A
Broad Side against Matrimony.

24. Omnia ista sagacitas hominum non sapientia invenit. — Invenit aliquis exercitati ingenii, & acuti, non magni, nec elati. — Omnia ista Ratio, non recta Ratio commenta est. — Hominis non sapientis inventa sunt. Seneca Epist. 90.

36. Plinius Natur. Hist. lib. 8. cap. 42. refert equum detracto oculorum Operimento, & cognito cum matre coitu, petiisse prærupta, atque exanimatum. Mox addit, Namque & cognitionum in iis intellectus est.

56. Xenophon ἐπομνημονεύματα libr. 2. hanc de Hercule sive Historiam sive Fabulam à Prodicò copiosè enarrat, ex Xenophonte breviter Cicero, Offic. libr. 2.

60. Juvenalis Sat. 14. Maxima debetur puero reverentia, —

64. Gomenii Opera Didactica claudit Vocabularium Sapientiæ, ubi Meditationes suas Didacticas retractat, & quam conceperat de Operibus suis opinionem mirruit.

79. Hæc Professio plus habet in recessu, quam

in fronte promittit. Plus habet operis quam
ostentationis. Quintil. Instit. lib. 1. cap. 4.

90. In Etate infirmam, & injuria de-
xiam, nemini debet nimium licere. Quint.
1. cap. 3.

92. Vide Valer. Max., lib. 8. cap. 6.

97. Palladæ Epigramma, Ἀγῶν γεραιῶν
ἐν νῆσῳ & ὅτι καὶ αἰγῶν, &c. extat lib. 1. in
Tholozæ.

98. Martialis lib. 12. Epigram. 13.

106. Sime Terentianus, Andr. act.
scen. 1.

109. Author est Cicero pro S. Roscio A-
rino, & in partibus Oratoriis.

131. De Gymnasticâ vide Platonem de
publicâ, lib. 2, & 3. Alexandrum ab Ale-
andr. lib. 2. cap. 25. Pausanoll. de Pe-
rit. 26.

134. Petron. Satyric. propter finem.

140. Rem magnam præstas Zoile si bonum
Mart. lib. 12. Epigram. 54.

166. Utq; Deos cælumque simul sublimem
Non vacat exiguis rebus adesse Jovi.

A te pendentem sic dum circumspicis orbes
Effugiunt chæras inferiora tuas. Or.

Trist. lib. 2. vers. 215.

167. Neque sine authore hæc dicta sunt.
Cicer. de Legib. lib. 2. Eustath. in Ho-
Iliad. pag. 428. & 1086. Edit. Basilicæ.

F I N I S.

ris qua
p. 4
ia ob
dint.

1. I. 3

3.
all.

Cio de

ma de
ab Ae
e Per

bonu

me in
Te. Jon
cis or
as. On

unt, V
H
ienf.